



ル 5
3252
2



門 几 5
號 3252
卷 2

昭和十七年
五月二十日
購求

廣東攷古輯要卷六

山川

廣州府

坡山 南海縣城內西南隅高三四丈向在江干相傳晉時渡

口故稱坡山古渡頭山為劉龔所鑿竟成培塿明洪武初建

鐘樓其上

浮邱山 縣城西上有朱明觀下有挹袖軒即浮邱丈人得道

之所宋蔣之奇方信孺明黎民表有詩

雙女山 縣西一名鳳山宋史開寶四年潘美等伐南漢渡瀧

頭之險至馬徑砦於雙女山劉鋹出降即此

三山 縣南三峰並起競秀凌空舊有三山寨明廖永忠擒邵

宗愚於此西有天生石俗名大石鼓東南有靈泉兩谷夾之

泉味香冽四時不竭

石門山 縣城西北兩山對峙夾石如門前有控海樓下有倉泉唐杜審言宋蔣之奇方信孺明張詡陳獻章皆有詩按史記南越傳樓船將軍將精卒陷尋陘破石門索隱引廣州記云呂嘉拒漢積石江中為門故名考南海古蹟記諸書皆云兩山夾江對峙如門乃天生形勝非積石為之呂嘉積石為門之石門疑非倉泉之石門也

黃麋山 縣西東南有二岩後有石室通明可容數十人元末土人常避寇於此

旗峰山 縣西形如展旗故名上有平石山腰流泉冬夏不竭靈洲山 縣西北以靈氣所鍾故名南越志肅連山西十二里有靈洲焉其山平原爛延層野極目景純云南海之間有衣

冠之氣者斯其地也肅連地名宋方信孺有詩

西樵山 縣西南周迴四十里峰巒七十有二互相聯屬面皆內向泉之名有十曰大珠潭大珠井曰金銀曰紫姑曰無底曰木鄧池曰天溪曰九曲湖曰小西其一曰樵洞之名六曰白雲曰碧玉曰廣朗曰石泉曰寶林曰獅子谷之名者一曰雲谷岩之名者九曰噴玉曰錦曰鉄泉曰翠曰通天曰玲瓏曰講學曰仙隱曰鳳凰台之名者十一曰仰辰曰伏虎曰玉鏡曰聚仙曰獨醒曰讀書曰望沙曰披雲曰臨翠曰鳳凰曰長春石之名者八曰洞賓曰飛來曰紫姑曰神女曰五指曰仙帽曰戩劍曰梁唐曹松宋李昉英明區大相有詩走珠石 在河南舊傳有賈胡自異域負其國之鎮珠逃至五羊國重載金寶堅贖以歸既至半道海上珠復走還徑入

石下竟不可見至今此石往往有光夜發疑爲此珠之祥明
方信孺有詩

荔枝灣 城西南漢昌華苑故址南越志江南洲周迴九十里
中有荔枝洲上有荔枝冬夏不凋

白鵝潭 在珠江上流二里水大而深每大風雨有二白鵝浮
出

沈香浦 城西北晉吳隱之罷郡見妻篋中有沈香一片遂投
於此水一名投香浦

拾翠洲 縣西南古有津亭唐陸龜蒙詩候吏多來拾翠洲是
也明建翠華亭於此

貪泉 縣西北一名石門水晉中興書云吳隱之往廣州飲貪
泉爲堅潔之性南越志石門三水俗云經大庾則清穢之氣

分飲石門則緇素之質變卽吳隱之酌飲之所也隱之詩云
古人云此水一飲懷千金試使夷齊飲終當不易心唐胡權
有賦宋古成之有詩

吊碑古井 在城中六榕寺有石碑橫水上長四五尺其半在
井牆土內形如弔卦於井中者故名味甘美居人取汲於此
四井 縣城內唐書地理志南海縣山峻水深民不井汲都督
劉巨麟始鑿井四今城內有日井月井星井乾明井疑卽其
故址也

太保泉 縣官溪一山屹於中流名曰小金山又曰靈洲明正
德中太保武定侯郭公世臣以公事自蒼梧下五羊經此勝
而登焉俯察地脉指曰此穴可井而有甘泉住持定禪鑿之
味甘而冽咸曰此太保泉也明徐志文有記

番禺二山 [番禺縣東南相連如城按水經注浪水東別逕番禺山海經謂之賁禺者也交州治中合浦姚文式問曰何以名爲番禺答曰城東南偏有水坑陵城倚其上聞此縣人名之爲番縣名番禺倘謂番山之禺也據此則番禺止一山不分二名矣

越秀山 縣北上有越王台故址唐韓愈詩樂奏武王台是也一名越王山明永樂初指揮花英於山巔起觀音閣俗呼爲觀音山

席帽山 在雙井街有南漢郊壇遺址明成化三年都御史韓雍立塾台其上

馬鞍山 在縣北一名馬鞍岡水經注裴氏廣州記曰城北有馬鞍岡秦時占氣者言南方有天子氣始皇發民鑿破此岡

地中出血今鑿處猶存以狀取目故岡受厥稱焉漢伏波將軍馬援嘗駐兵此岡每風雨晦暝聽之若有軍聲殷然其赤石岡 城東南南越志其色若丹占氣者謂其下有黃金扶南人欲以金萬鎰市之刺史韋朗謂南州之鎮不許明天啟間南海李待問建浮屠其上

白雲山 縣城北上多白雲高三百餘丈盤踞百餘里其下有龍泉泉之下爲大小水簾洞北一里有鶴舒臺安期生飛昇處臺之北有飛霞洞高百仞瀑布飛流又有虎頭岩其前爲虎跑泉宋運使陶定于半山建龍泉寺題曰千峰紫翠亭曰天南第一峰今廢去西南一里爲玉虹洞其南爲聚龍岡滴水岩菖蒲澗澗旁有蒲澗寺煉丹井左有菊湖今湮

亂石山 縣城北與白雲山相連一名白雲後洞一名紫雲下

有水曰月溪唐杜審言有詩

棲霞山 在白雲山西南五里昔景泰禪師卓錫於此一名景

泰雲峰中有泰泉下有泰霞洞

盧侯石 縣東南相傳吳隱之與盧循戰處一名南箕石

青螺嶂 在城南有葛洪弟子黃野人煉丹處一名白鹿岡相

傳劉龔時獲白鹿於此

博大山 縣東北山有盧循母檀氏墓東南有盧候循浮海與

吳隱之戰立烽候處山下溪有神鼎唐劉道錫刺廣州遣人

繫鼎引出鼎耳斷鼎沒執粹者耳盡痛

相對岡 縣東南兩岡相峙大江中流宋方信孺有詩

珠江 在城南一名沈珠浦偽傳賈胡沈珠於江化為石其上

有寺士大夫燕遊餞送多在此

瀝滸堡江 去城十餘里即古東衝宋書孫處傳由海道龍衣盧

循於番禺即此

沈夜湖 縣北南越志縣北有三湖一曰沈夜二曰葦湖三曰

芝蘭湖芝青藹景紅花亂目素鱗紫介此焉游咏父老云沈

夜湖者本層山連岫以永嘉之末一夕而沈故曰沈夜按三

湖今惟有芝蘭湖在席帽山下餘皆湮

菖蒲澗 在白雲山東北一名甘溪南越志昔交州刺史陸允

之所開也澗中多九節菖蒲世傳安期生採菖蒲服食之以

七月二十五日於此上昇郡人每歲是日往澗中沐浴以祈

霞舉宋蘇軾楊萬里有詩

波羅江 城東南海神廟前唐韓愈碑扶胥之口黃木之灣即

此廟西有小邱屹立上建浴日亭蘇軾有詩

越臺井 縣北趙佗所鑿深百餘尺泉味甘冷南漢號玉龍泉
宋番禺令丁伯桂始伐石闢九竅以覆之因名九眼井後來
乃亭其上曰達摩泉相傳梁時達摩禪師初來指其地曰此
下有黃金民競掘之數丈而遇石穴而泉迸湧達摩云卽此
是也今越岡無他井蓋卽佗井無疑矣

學士泉 縣北明天順中學士黃諫謫廣州品其水爲嶺南第
一

九龍泉 在白雲山鄭安期隱於此初無泉有九童子見須臾
泉湧故名

鳳山 順德縣西前曰金榜山城跨其上昔道人游隱堂羅務
光嘗修煉於此下有紫霄圖煉丹井遺蹟

神步山 縣東南怪石峻峭數峰奔騰逆上明萬厯中知縣倪

忠築青雲路

都甯山 城東北其下龍岩峻壁峻嶒左列大石數品中有黃
嫗洞相傳五代時有黃嫗避地於此

龍頭山 城西南亦曰龍馬山蜿蜒最秀西爲馬登山南爲象
山上有墩下有馬鼻巖明鄒智常鼓柷遊此今人稱爲泊鄒
崖

鳳凰山 城西北有泉懸出名漱玉旁居鄉人多清節士吳貞
女居此

碧鑑海 縣西南自粵江分流至此曲折環合其色澄碧故名
甘竹灘 縣西南灘石奇聳聲如雷霆江水海潮相爲吞吐邑
之巨觀也

回蘇井 城西北冬煖夏涼飲之已病

道家山 東莞縣城內西南山巔有上清觀宋時道士崔紫霞
自羅浮來居此鑿井得泉名紫霞泉上有鳳凰臺相傳有鳳
集於臺下有亭邑人結鳳臺詩社於此

金牛山 縣西山勢岩巖下瞰海水山巔有亭攀緣而上名曰
海月奇觀水光接天一目千里

青紫峰 在縣城南高八十丈周五里浥朝霞則青當夕照則
紫宋陳應宸有詩

黃嶺 縣南唐十道志嶺南名山之一曰黃嶺其山峰巒秀拔
狀如卓筆逶迤而西下有廉泉明袁昌祚有九日登黃嶺詩
銅嶺 縣東宋熊將軍飛結義勇與姚文虎力戰於此左為花
溪右為銀塘有將軍別墅飛自刻花溪銀塘四字於石亂之
復整人以為神

石鼓山 縣西南上有石如鼓南越志其土有亂則鼓鳴昔盧
循來寇隱然有聲循即敗

神山 縣東有石狀類神其陽為鼓鎮峽下有龍潭即龍江所
經也水濱有許公巖最險

秀山 縣西南有大虎小虎山俗號虎頭門志云即秀山也宋
景炎二年元將劉深攻帝於淺灣張世傑戰不利奉帝退保
秀山明廖永忠下東莞次虎頭關今外夷入貢及使島夷者
皆取道於此

海月巖 城西南上有石井古傳海上風帆影落井中今無

武山 縣南宋余靖嘗候潮于此
到涌水 縣東南源自道家山來方言呼港曰涌即古所謂到
港也

雙女湖 縣東南舊圖經云昔岡下有雙女陷湖歲月綿邈每至晴霽湖中有雙鯉長丈餘

廉泉 在黃嶺之麓宋紹興間邑宰張勳築亭甃石扁曰廉泉元郭應木有銘明盧祚有箴

紫霞泉 縣西南宋時有道人崔羽號紫霞真人遊羅浮至此擇地鑿井得之

水簾 縣西彭崗山巔舊有大藤橫垂削壁雙瀑瀉藤而下狀若垂簾明盧寬有詩

杯渡山 新安縣南世傳有杯渡禪師渡海來居一名屯門山唐韓愈詩乘潮簸扶胥近岸指一髮屯門雖云高上映波浪

沒卽此南漢大寶十二年封爲瑞應山今有瑞應巖虎跑泉掛角山 縣東南一名桂角山多老桂兩峯對峙其形如角故

名牛潭一名鼇潭有雲卽雨上有仙女梳粧石宋鄧苻築力行書院講學其下今遺址尙存

參里山 縣西北方廣五里南越志寶安縣東有參里縣人黃舒者以孝聞於越華戎慕之如曾子改其里曰參里也按東

莞縣東晉爲寶安縣地今新安縣明萬厯初析東莞縣地置九逕山 縣南下臨屯門澳明海道汪鉉帥土人殲佛朗機於此

紅水山 城南昔傳土人於此遇賊殲焉坑水盡赤故名上有龍船石二一仰一覆叩之聲如洪鐘

官富山 在縣東南山之東有官富場行朝錄景炎二年四月帝舟次於官富場是也

廬山 縣東北一名百花林其山絕險上有潭潭旁復通線路

山內有田可耕常爲寇盜所據昔於山前置寨今廢

梅蔚山 縣南大海中行朝錄景炎二年正月南狩幸此今有石殿舊址

大奚山 縣西南山多鹽田宋以爲李文簡食采事無可攷或者大奚山中有文簡自置鹽田其後子孫因以爲業耳宋紹興時設屯兵於此明祈順有詩

南亭竹沒山 城東南大海中林木叢茂內有盧亭相傳爲盧循之後能入水捕魚以棕葉竹籜爲衣

大鵬山 縣東南一名七娘山相傳有仙女七人遊此故名有龍潭鹿湖羊塘石室危石高岸飛瀑諸勝

大步海 縣南中有媚珠池南漢時採珠於此
零丁洋 縣零丁山下宋文天祥詩辛苦遭逢起一經干戈落

落四周星山河破碎水飄絮身世浮沈風打萍惶恐灘頭說
惶恐零丁洋裏歎零丁人生自古誰無死留取丹心照汗青

珊瑚洲 縣南昔有人於海中捕魚得珊瑚

鐘潭 在縣隆興寺旁昔傳廢寺佛像委潭內其鐘飛入覆之土人善水者往往見其鐘紐欲決水取之輒遇風而止

龍穴洲 縣南大海中有龍出沒其間故名春波澄露有蜃氣結爲樓觀城堞人物車馬之狀

石鼓樓山 從化縣城有石穴大如屋溪水滙注衝擊有聲故名又名鵝形嶺

風門山 城西高七十丈周三十里山陰有劉化巖相傳劉氏女於此上昇是多積米之窟水孟出其半有積水常不竭

雲臺山 縣北山巔平行如臺常有雲氣覆之旁有洞穴可容

三百餘人明梁有貞詩杖策恣遊討茲山信奇淑臺高隱半
雲巖深看飛瀑

百丈帶山 縣西北高可丈周百里有泉自山巔飛下分爲兩
道望之如帶明吳旦有詩

蜈蚣山 縣西南有三十餘節形如百足其麓有鐵場坑相傳
舊常於此煮鐵

北山 縣東北周百里三峰峻拔上入雲漢明黎貫有詩
鷹嘴山 縣北其巔有石曰燕石遇雨時若飛舞

石榴花帶水 縣東北山多野石榴花時夾水相映故名
楊州寨塘 縣東明正德時所鑿計廣八十餘畝

湯泉 一在縣北草石徑溪旁一在縣東北黃蠶嶂下有硫黃
氣如湯沸可熟生物

七星岡 龍門縣城內岡凡七曰樞精岡曰璇岡曰瓊岡曰權

星岡曰衡岡曰闔陽岡曰搖光岡珠聯不斷故云七星

石馬山 縣北石磴旁列旁有五石名童子讀書石

聖礫嶺 縣南上有喬木中有石磴流水九曲注爲飛泉百十
丈下有深潭不測歲旱以紅鐵投之則霖雨驟至爲一邑勝
槩

天柱嶺 縣南上有石牀世傳絕巘有羅隱題蹟

蓼溪嶂 縣東南山勢峯岬遠眺羅浮如在咫尺上有池曰卧
鹿方二丈隆冬水潤不竭

岳潭 縣東埔何村之界澄淨清碧有石如鼓俗名岳鼓

虎跳潭 縣南上有兩石相對各高丈餘虎跡宛然

甕泉 縣南有石如甕者七大者徑二丈小者徑一丈上有泉

白石面湧出以入於甕而潛流為溪其性甚烈

石人山 新寧縣東北又名石化山旁有數石峰明兵備王大

用射三矢於石以示武泐之曰石化山

百峰山 縣東峰巒百計蠻獠所出沒也下有石板潭明歐大

任有詩

潯洋山 縣北峰巒高聳俯瞰潯江其左為仙女峰世傳仙女

劉三妹所居石菴有藤籃水盂二石諺云好唱莫如劉三妹

好打莫如朱光卿皆以絕技名也蓋三妹善謳不嫁修道於

此遂仙去云有草開花如錦名映山紅他山皆無之俗以為

仙花

上川下川二山 縣南山多香蜡竹籐居民煮鹽者取水於此

下川山相近者曰海晏村明洪武四年海寇鍾福泉等挾倭

船寇海晏下川官兵追討至陽江平之於是徙二山居民入

內地山遂荒廢

銅鼓山 縣東南層巒疊峙俯瞰大海風濤觸石聲如銅鼓故

名下為銅鼓海

湯湖 縣南玉懷峯之下四時如湯一名溫泉

雷潭 縣西雷常輿於此故名

鳳凰山 增城縣城內南隅輿地紀勝本名春岡宋熙寧七年

有鳳凰來集因名其陽有菊坡亭萬壽寺上有鳳凰臺

浮碇崗 縣東五里其色赤與羅浮相望圖經云浮山自海上

浮來合於羅山此崗若浮山之碇

貌山 縣東南二十三里多婆娑摩竹圍三四尺至堅里人以

為弓弓形如弩見元和志今失所在

羅浮山 縣東北與博羅接界四圍高聳為廣惠二郡之障

博羅縣下

泉山 縣西屹若巨屏上有瀑布百餘丈懸注如練元和志云其上多漆樹寰宇記增城縣白水山有五距烏按白水山蓋即泉山後人傳寫訛合白水二字為一也

雲母山 縣東寰海記云出雲母石續南越志唐天后朝增城縣有何氏女服雲母粉得道於羅浮山因所出名之

鯉山 縣北有荔枝樹高八丈相去五丈而連理載寰宇記今不可考

增江 縣城東亦曰相江以崔與之作相得名唐韓愈詩雲昏水奔流天水澆相圍

別情洲 縣東南江水之中小洲四面懸絕古老相傳於此洲

上叙別因此為名見寰宇記今名鴈塔洲

龜泉 縣西青山有神龜帶銅環上此水有穢此水則便澍雨見元和志

仁山 香山縣城內東為壽山西為武山東南為豐山外有盈山福山鳳山已平於築城時以其羅列如星環拱縣治名為七星峰

大北山 縣東元末宣差托囉克台守其上一名舊寨山

雲梯山 縣東張許二道人嘗結菴絕頂今石匾猶存

浮虛山 縣北峙海中望之似隨波上下按山海經南海有浮石之山疑即此宋鄧光荐有記

烏巖山 縣東南巖崖幽暗人跡罕到宋末鄧光荐避亂居此光荐有至烏巖山贈趙承節詩

濠鏡澳山 縣東南突出海中明初番舶往來泊無定所率擇海中地之灣環者為澳若新寧則有廣海望崗東莞則有虎門頭屯門雞棲香山則有浪白濠鏡十字門皆置守澳官嘉靖初諸澳盡廢惟濠鏡為泊藪萬厯初因於澳口設關關外割為諸番住所今遷棄

三竈山 縣西南海中林木葱翠有三石如竈故名元末海寇劉進據焉明初平之有田三百餘頃皆極膏腴後奸民復通番為亂二十六年指揮花茂殲其魁悉遷其餘黨禁民不得耕種

橫琴山 縣南海中二山相連東曰小橫琴西曰大橫琴元末為海寇王一所據明洪武二十八年平之詔墟其地

燕子石 縣東以形似名縣志顧商死於山上一宿蟻銜泥成

墳號貢章墓疑唐孔璋墓也

九星洋 在城東南海中有九島如星為九星洲山小多石巖石室可坐十餘人其草多芝蘭

石岐海 縣西北中多洲潭種蘆積泥成田唐鄭愚泛石岐海詩臺山初罷霧岐海正分流

井澳 縣南橫琴山下亦名仙女澳宋史瀛國公記景炎二年帝舟入海至仙女澳遇颶風舟敗幾溺又馬南寶起兵井澳即此

開元泉 縣北飛駝山明崇正時何吾駒與其友搜得此泉開元者乃其二友之名也

古岡山 新會縣城隍廟前相傳隋設岡州於此

象山 縣西形如蹲象石角峻响明萬厯初築外城其西就山

為城相傳昔為石磯名象山角舟人視為險灘後漸闕為田
圭峯山 縣北一名玉臺山上多松竹瀑泉出焉明陳獻章有

詩

潭波羅山 縣南寰宇記云昔外國人嘗居此山潭波羅者番

語也

崑山 縣北有道人卓菴于上其巔有井曰天井

崙山 縣西北上有白龍池故老云有龍飛騰於山巔見輿地

紀勝

厓山 縣南宋紹興中置厓山寨控扼烏豬大洋之險祥興初

太傅張世傑奉帝昺自碭洲駐蹕於此上有宋行宮草市故

址山巔有石刻張宏範等功前有奇石書元張宏範滅宋於

此明宏治中御史徐瑁改刻云宋帝及丞相陸秀夫沈於石

下今建全節廟大忠祠於山中宋文天祥元張撟明梁有譽
有詩

金山 縣西唐志岡州以金岡而名其地產金下有澗金坑旁

皆沃壤今皆為民田不復有金坑矣西北有石洞曰金山巖

深廣皆二丈巖頂瀑布其白如練有盪石可坐數十人

紫水 縣西宋皇祐間水色偶變而為紫者旬日人以為瑞故

名

神仙井 縣西兩大山側澗水流疊石間滙為池大小不一皆

有高下層次中生天然石椀巖左隙中一水直往椀內夏寒

冬煖椀旁有掌跡二幘跡二相傳仙人白玉蟾過此踞地飲

水頭頰手按入石成痕不滅

湯湖 縣西南迤邐長溪中流一帶其熱如湯上下之流皆冷

崑都山 三水縣東南宋立斥堠於此廣州叅謀劉領擒海鹽

盜蔡母謹和尚於三水鎮是也

石頂峰 縣東唐張九齡過此有詩

盧嶺 縣西北六祖盧能駐錫於此故名

仙蹟石 縣華山上寬平如掌有巨蹟俗傳李仙飛昇處

鴨浦水 城北水自萬山中出夏冷冬溫鴨鶩樂聚故名

樂塘江 縣北明永樂高安潛溟為廣東副使朝覲經此洗硯

失水中次年還舟泊江側見硯隱隱在沙拾之作詩以記

峽山 清遠縣東一名中宿峽譚子和海嶠志二月五月八月

有潮上二禺峽逐浪返五羊一宿而至故曰中宿峽輿地紀

勝云崇山峻峙如劈太華中通江流廣慶寺居峽山之中有

殿甚古梁武時物也舊傳黃帝二庶子善音律南採崑崙竹

為黃鍾之管隱於此山祠在東廡又謂之尋峽漢樓船將軍

楊僕出尋峽去始興三百里近連山即此峽也唐沈全期

有賦張說宋之問李翱楊衡許渾胡曾宋蘇軾蔣之奇崔與

之李昂英元賈煥明揚起元朱燮元有詩

金芝岩 在峽山北頂上唐開元中望氣者云五十里內有靈

山發金草遣使求之獲靈芝鏗然作金聲因名

標蟠嶺 在峽山南頂上唐大曆中哥舒晃叛廣州遣將平之

夢神人謂曰見幡即回及賊平回師果見掛二幡禺山頂乃

知山神之助見輿地紀勝

龍磨角石 峽西北石細滑方圓二丈每年春有龍於此磨角

有新舊痕宛然見寰宇記

獅子石 峽北山頂上寰宇記云形如獅子古老相傳昔有僧

居其石而無泉感老人指泉今玉泉寺和光洞在中宿峽內有
四色石榴花

真水 縣東漢樓船將軍楊僕出豫章下真水是也一名滇水
黃巢磯 縣東相傳黃巢嘗覆舟於此

廉水 縣西輿地紀勝云有人姓廉居此因名

金鎖潭 縣東秦時崑崙貢犀牛帶金鎖走入潭中晉時有漁
人周重案者釣得金鎖牽之見犀牛掣之不得忽斷得金鎖
一尺見寰宇記

放生池 卽峽山前峽水唐天寶年間京師劉楚舟泊寺岸見
五色雲從峽山起夜夢數人各青衣揖謂曰願易此海爲安
樂窩也晨興與知者議曰莫非水族必此界之神龍也表聞
於上遂奉敕禁絕漁捕賜峽爲祝聖放生池

百丈嶺 花縣城北山石嶙峋其高千仞爲縣治屏展

烏石巖 縣西南望之如墨外實中虛巔有仙人壙

更鼓石 縣西四十五里山有巨石高懸如鼓遇有山賊嘯聚
動衆徵兵則此石夜鳴居民甌釜皆響故名

韶州府

筆峰山 曲江縣北爲郡主山一名帽子峰上有整冠亭鳳來
亭今廢

靈石 縣東北水經注利水南經靈石下一名逃石耆舊傳言
石本在桂林武城縣因夜迅雷之變忽然遷此彼人來見歎
曰石乃逃來因名逃石以其有靈運徙又曰靈石其傑處臨
江壁立霞駁有若繪焉水石驚瀨傳響不絕商舟淹留聆玩
不已按元和郡縣志有牢石在曲江縣東蓋卽逃石以逃牢

聲而訛也

皇岡嶺 縣北端整如屏下有舜祠唐韓愈有詩

蓮花峯 在城南形似蓮花故名宋史開寶三年潘美伐南漢

劉鋹使其將李承渥列象為陣拒美於蓮花峰下即此

芙蓉山 縣西山半有石室伏洞深莫可測漢末道士康容得

仙於此唐許渾有詩

玉山 縣東卉木滋茂泉石澄潤寰宇記云玉山山下有廟曾

有人得玉璞於此

王山 縣北俗名越王山二千石初到皆致虔祠水旱祈禱多

應見寰宇記

紫微洞 縣西南宋紹興間朱翼謫居曲江遇父老指示始得

遊此洞可容數百人

書堂巖 縣東張曲江讀書之所有元結題石云次山自道州

刺史容管經畧史是時賊尙據本道以蒼梧為治所北歸取

道於此舍人朱翼跋云次山好奇所至遇佳山水必加雅目

此巖獨不辱品題豈以曲江公嘗讀書其中故不欲更稱述

耶今次山題刻不存惟翼題名宛然

靈鷲山 縣北水經注本名虎群山亦名虎市山以多虎暴故

也晉義熙中沙門釋僧律葺宇巖阿猛虎遠跡蓋律仁感所

致因改曰靈鷲山唐房融有詩

招隱巖 縣西宋有新州盧居士隱此蛻去提刑耿南仲為書

招隱二字刻石

韶石山 縣北昔虞舜登此石奏韶因名晉永和二年有飛仙

游其上張循州韶石圖有三十六石名新婦石毬門石大禾

倉石小禾倉石太平石盤龍石獅子石侍石上鱗魚石下鱗
魚石帽子峰石鳳閣石羅仙峰石雙闕石馬鞍石四接石使
石三峰石桃石大香爐石小香爐石駱駝石奏樂石樓閣石
寶蓋石硯面石虹霓石朝仙峰石覆船石五羊石圓石巖鐘
石續石石白石井缺一嶺外代答祇列三十五石而缺其一宋李昉英有說余
靖楊萬里蘇軾蔣穎叔有詩

大峒山 縣東有石洞廣十餘丈宋余靖有序及詩

南華山 縣南溪水迴環峰巒奇秀產茶與椒上為象嶺唐儀

鳳初僧盧能傳法於此一名儀鳳山宋蘇軾楊萬里文天祥

有詩

林源山 縣北一名臨沅亦名洹山水經注林水出縣東北洹

山王歆之始興記曰林水源裏有石室室前盤石上行羅十

瓮中悉是餅銀采伐遇之不得取取必迷悶晉太元初民封
驅之家僕密竊三餅歸發看有蛇螫之而死

錢石山 縣東湘州記云其狀四方有若臺巨石三面壁立上

有碎石如錢故名

岑水 縣南一名膽礮水又名銅水宋置場採謂水能浸生鐵

成銅又出生熟膽礮若役民採之歲以充貢取之極難丁狀苦

之明成化初都御史韓雍革去

邸水 縣東南齊書五行志永明二年縣山崩壅流邸溪水成

陂即此一名修仁水齊范雲為始興太守至修仁水酌而飲

之賦詩見太平御覽

雲水 出縣北湯泉泉源沸湧浩氣浮雲以腥物投之俄頃即

孰其中時有細赤魚游之不為灼也見水經注

皇潭 縣北皇岡下潭側有舜祠昔為舜遊之處

曹溪 縣東南梁天監元年天竺僧智藥自西土來泛舶尋流至韶州曹溪水口聞其香掬嘗其味曰此水上流必有勝地尋之遂開山立石寶林云後百七十年當有無上法師在此演法今六祖南華寺是也唐張喬有送仰山禪師歸曹溪詩
虞泉 縣北皇岡下舜祠東巖味極甘冽冬夏不竭宋方信孺有記

宣溪 縣南唐韓愈詩韶州南處接宣溪是也

大湧泉 縣東南泉出石罅色白如乳宋朱翼謫居曲江游此有記

卓錫泉 縣東南曹溪六祖浣衣卓錫所在宋蘇軾有銘

昌山 樂昌縣東拾遺志云山有石平廣數十步上多竹木交

蔭每至佳節為士庶嬉游之所呼為樂石今取山為縣名

泐溪嶺 縣西北下有石室即西石巖又名仙人石室宋余靖有記

白石嶺 縣北一名寶山唐沈佺期有詩

冷君山 縣東北水經注云冷君山群峰之孤秀也晉太元十八年崩千餘丈於是懸澗瀑掛傾流注壑頽波所入灌於瀧水一曰靈君山有靈君之神因名舊圖經云山頂有池內有肉根名九牛根與半夏同

藍豪山 縣西北水經注云山名藍豪廣圓五百里岨峻險阻巖巘千天交柯雲蔚霍天晦景謂之瀧中

冷水 縣東北一名靈溪水舊經云水味甘飲之者壽鄉人取以醞酒

三瀧水 縣西曰新瀧垂瀧腰瀧唐韓愈貶潮州過此作瀧吏詩遂名韓瀧後以險處頗多又增三名曰崩瀧金瀧白茫瀧謂之六瀧又東南下岐門灘峻急如瞿塘下經樂縣南入曲江界元至正初始鑿新瀧西路明正德中鑿東路嘉靖間知府符錫沿江開鑿疊石為徑以便行人見縣志按後漢桂陽太守周昕開六瀧瀧之名已古志云三瀧以韓愈所經名韓瀧後增三名云云與舊說不合

盧溪 縣西北即古黃岑水寰宇記云此水合武水處甚險名曰新瀧有太守周昕廟即始開此瀧者行者放鷄散米以祈福而忌著溼衣入廟

六祖泉 縣蔚嶺之西泉極甘冽昔傳六祖過此卓錫而出故名

書堂巖 (仁化)縣南壁立千仞巖竇隱見而無路可攀相傳余

靖嘗讀書於此

錦石巖 縣南其徑彎環直上千餘級夾道杉松高凌霄漢宋余靖有詩明知府符錫有記

丹霞山 縣南舊名長老寨壁立梯懸四周陞絕乃韶人避亂之所明末河南鄧州李永茂移家於此因鄧州有丹霞而海螺諸峰色如渥丹故名丹霞永茂有記

廉石山 縣北山有石井其泉清冽又石罅中有鎗竿相傳黃巢過此所投者

吳竹嶺 縣西北下有吳溪世傳越王勾踐滅吳其子孫避地於此

鵬風山 縣西相傳有巨鳥至此故名

白星山 縣西南相傳唐武德中有星隊山頂光如曳練故名
會湏水 縣南水色潔味甘美多白石舊傳飲之令人壽志意

清潔

恩溪 縣北舊經云越滅吳之後王之子孫避居於此行失路
逢一女子導而去後以金帛遺之因名恩溪

鐘乳巖 乳源縣北形如卧獅穴中有石擊之有聲出鐘乳粉
今無

臘嶺 縣西壁立峭拔郴州騎田嶺為五嶺之一此其分支夏
寒如臘故名

九仙巖 縣東南相傳昔有韓氏九女學道於此得仙今其下
有九仙廟禱雨多應

梯雲嶺 縣西高出雲漢升躡如梯石壁殘碑訛不可讀

湯泉 縣西有石如長盆地中出泉若湯沸人多就浴

馬峒 翁源縣東相傳越王之子白馬王煉丹於此鄉民祠之
壇址猶存

獅子嶺 縣東南山骨峻峭形如獅子為東南要道舊名猿藤
逕宋提刑楊萬里討惠潮賊嘗經此有詩

寶山 縣北高千餘仞石山之巔復載一石其下有池環繞左
右東巖出泉深不可測春夏水溢時有巨鱗躍出多蓮藕夏

月過此則芰香馥郁水石凌麗一奇觀也舊有寶山寺今廢
梅巖 縣北高約十仞內極深廣以宋進士梅鼎臣讀書其中
得名

羊逕山 縣西北兩崖對峙岑水中流石逕二十餘里峻險曲
折不亞羊腸明宏治中鑿石為坦道半道有石門扼塞可以

拒守

書堂石 縣東羅立瀧水中高九十丈周五里唐邵謁讀書於

此

翁山 縣東北一名靈池山壁立千仞山頂有靈池池有八泉

曰湧泉溫泉香泉甘泉震泉龍泉玉泉乳泉唐張文獻碑所謂八泉會而為池即此

翁水 縣東北寰宇記靈池山池中有石人或藏或見鬚眉皓

白號翁人居此源皆享壽考因名翁水

峰口龍潭 縣北潭有龍遇旱鄉人灑石灰觸之即雨

耽石泉 縣北華蓋山高峰絕頂巨石如屏有泉自石中湧出

宋余靖摩崖記之

燕子泉 縣治右側春出秋伏與燕子同來去故名

南山 英德縣南下有栖霞洞涵暉谷北為鳴絃峯世傳舜南

巡彈琴於此宋汪任詩滇陽富佳致無以過南山

碧落洞 縣南下通溪流懸石如霓旌羽蓋狀南漢主晟嘗假

宿其中命侍臣鍾允章撰碧落洞天盤龍御室記唐周夔羽

皇作記鐫石日到難篇宋余靖蘇軾程之才有詩

皋石山 縣南一名滇陽峽水經注云潦水西南歷皋石太尉

二山之間是日滇陽峽兩岸傑秀壁立虧天昔嘗鑿石架閣

令兩岸相接以拒徐道覆

太尉山 縣西漢郡守鄧彪嘗駐此後召為太尉故名明黎遂

球有記唐張九齡有詩

英山 縣東即古滇石山水經注滇石山廣圓三十里挺嶮大

江之北盤址長川之際其陽有石室漁叟所憩昔欲於山北

開達郡之路輒有大蛇斷道不果是以今行者必於石室前
汎舟而濟

堯山 縣西赭岳迭起冠以青林與雲霞亂采見水經注相傳

堯南巡時登此或謂以山堯然而高故名堯俗誤為堯山云
宋米芾有詩

白鹿岡 縣東水經注云咸康中郡民張魴為縣有善政白鹿
來遊故名

滇山 縣西北秦末趙佗築萬人城於此

潮水巖 縣東泉出石竇與海潮相應明湛若水有詩

輪石山 縣北一名彈子磯明翁大立黎民表有詩

瀧頭水 縣南兩山夾峙水多激石宋史潘美伐南漢克英州
次瀧頭即此

流杯池 縣西北山泉兩道合流石壁間盤迴曲折可以流觴

舊經云衡州刺史陳伯信每歲禊飲於此

清溪 縣北岑水曲江合流至此而沃蓋山有三灣水環山而
瀦澄澈可鑑宋元祐間廣帥蔣之奇作三灣亭詩

廣東攷古輯要卷七

山川二

惠州府

白鶴峯

歸善縣治後亦名鶴嶺輿地紀勝云相傳稱惠陽為鶴嶺以白鶴名峯紹聖中蘇軾安置惠州卜居於此

椽木山

縣北地產椽木宋陳堯佐守郡時建野吏亭蘇軾記其壁

子西嶺

縣城外宋博士唐庚謫居於此庚字子西故名

寅山

縣東北青松紫幹四衢皆竦下多茯苓見寰宇記

黃峒山

縣西相近曰吳洞山雲集其上輒雨鄉人每以為候明吳高有詩

九龍山

縣東上有龍潭歲旱以鐵投之致雨

礫頭山 縣東北其山高大明嘉靖中巨盜楊立據此僉事尤瑛討平之

西湖 城西一名豐湖輿地紀勝豐湖廣袤十里治平間陳偁領經畫築堤截水宋林俛豐湖集序云湖之潤漑田數百頃葦藕蒲魚之利歲數萬民之取於湖者其施已豐故謂之豐湖宋陳堯佐楊萬里劉克莊明魏浣初有詩按杭潁二處皆有西湖東坡連鎮二州故表謝云入參兩禁每玷北扉之榮出典二邦輒爲西湖之長晚謫惠州州亦有西湖焉故魏浣初詩有玉局文心絕代無天教到處飲西湖之句

東湖 城內一名塔子湖宋州守陳偁教民以牛車汲水入東湖漑田卽此

釣潭 縣北江西有盤石可以垂釣東坡嘗遊之有詩

龍塘泉 城南沙子步水最宜茶唐子西以爲不減清遠峽

船澳 縣上下淮都海濱宋丞相文天祥嘗駐師於此

浮碇岡 博羅縣城內相傳浮山初來碇石於此宋傅烈有詩

石鼓嶺 縣北嶺巔皆紫黑石一石圓徑五丈擊之有聲又名

神鉦

黃甲峯 縣北高五十丈邑人以山巖有光占驗科第

白水山 縣東北山有瀑布泉二十丈下有石壇佛跡甚異一名白水巖宋蘇軾有記及詩

羅浮山 縣西北與增城縣接界後漢書郡國志博羅有浮山自會稽浮往博羅山元和志云羅山之西有浮山蓋蓬萊之一阜浮海而至與羅山並體故曰羅浮高三百六十丈周三百二十七里峻天之峯四百三十有二宋鄒師正有羅浮山

指掌圖紀云遊山者自龍華寺有陳孝女昌福夫人祠七里登山初至

延祥寺唐額明月戒壇唐時度僧於此受戒百尺壇唐祭鐵佛像西域所獻

御園柑子唐額中閣唐僧懷德宗幸蜀花樹枯至山腰三里餘有

寶積寺宋額中閣唐僧懷德宗幸蜀花樹枯至山腰三里餘有

藏錫杖泉景泰禪師錫之地銅佛像寺後羅漢巖伏虎巖隋僧惠越居此嘗引

其股佛跡石上山十里有大小石樓鐵橋峯上界三峯青羊

巖夜樂洞昔人聞仙樂於此犀牛潭試劍石在夜樂洞中軒轅集於此試劍瀑布泉

鳳凰谷鳳谷潭瑤石臺飛雲瑤池阿耨池景泰禪師入定之處夜樂

池阿耨塔梁蕭答建有二十六所泉源山玉鵝峯龍王坑景泰禪師說法於此有龍

聽上中下龍潭華首壇資福寺南樓寺去延祥之西五里餘

曰黃龍洞南漢於此建天華七里壇獅子洞華首臺山背曰鳳凰岡

雲母溪循延祥而東七里餘抵冲虛觀葛仙所居丹竈有東坡書

四衣冠塚葛仙尸解葬其衣冠蓬萊閣後遺履軒鮑仙葛仙所談之所銅玉皇像

及二侍從三尊南漢所鑄者觀後朱明洞朱真人所治朝斗壇黃野人

庵野人葛仙之門人也釣魚臺青霞谷野人洞即王子書堂坑觀之北

曰醪醪觀麻姑峯南曰觀源洞昔仙洗藥之所西北曰幽居洞有鄭

堂滴水巖長壽觀本南漢天華宮今呼南天宮中路直上君子巖雲峯巖

其下蝴蝶洞洞多蝴蝶云是葛仙遺衣所化前曰水簾洞張秘書留丞相讀書於此天漢

橋路出藥槽其下為流杯池昔有八仙會飲於此側羅浮石

刻東龍潭自冲虛觀出會仙橋抵明福觀南漢建迺遷到石洞

即卽仙騎牛入石處小水簾洞白鶴觀東北至蛇穴單道開蟬蛻之所又東至

蓬萊洞了髻峯有劉仙壇劉高尚打坐處峯下有試劍石有羅陽溪

東林寺山之東西有香臺會真櫻桃拋球刀子錦繡黃猿鉢

孟致雲大旗小旗雲母諸峯又有金沙石白朱陵太和赤石

白雲諸洞奇巘秀峯喘流怪石不可名狀宋蘇軾有遊羅浮
題名記梁蕭譽有銘宋謝靈運有賦齊江淹陳陰鏗唐劉禹
錫宋楊萬里留元宗明歐大任有詩

石鑑 縣羅浮山石樓之南稍東近孤青峯有一石光彩如鑑
石下有黑白棋子十八枚往來相盪元人拈之不起名曰仙
弈

七曜洞 縣境唐元宗嘗獲古樂器於此王維有賀表

榕溪 縣西明潘勗有詩

麻姑池 縣羅浮山麻姑峯下一名白蓮池宋蔡元厲有詩

溫泉 縣東北白水山下熱不可濯宋古成之有記

五坡嶺 海豐縣北宋景炎戊寅文天祥自潮陽走海豐方飯

元千戶王惟義執之吞腦子不死即此處

黑龍山 縣西北寰宇記山在大海之上嘗有黑龍潛於山穴

時輿雷雨騰翔海水因名

大溪嶺 縣西明景泰時驛路經此瑩以石舊有石亭今廢

大金龍山 縣西南山形如龍鎮長河海口按龍本作龍宋端

宗易今名

旗峯山 縣東山狀如旗半枕海上有石高二丈五尺面方二

丈宋太宗祥符間大中大夫陳讜寓此書桂林二字

漲海 縣南宋文天祥嘗率舟師駐於此

麗江 縣南宋景炎二年文天祥走惠州收兵出海豐次於麗

江口是也今有御宴潭相傳宋端宗賜宴於此明彭祚有御

宴潭詩

新濬水 縣東南沃野一望四百餘丈舊水道不通蠻民有東

西溪之別宋師至此不得渡鑿而通之上五里有嶺號宋師嶺

犀頭山 [陸豐]縣北狀若犀牛在大安水口下有小潭土人常以水之淺深驗其地之貧富號為聖潭

鷹嘴嶂 縣北狀如鷹嘴中有石巖每遇天陰欲雨則狀如飛烟散霧轟震之聲從山中出聞十里以外若霖雨欲晴亦然土人以驗天時百不爽一

內洋山 縣東北巨石對峙循徑而入山澗屈曲明季賊首楊子亮所據巢立六營今居民叢集改曰內洋

腹石山 縣甲子門所有宋帝陸相遺像今半明滅

甲子川水 縣東南海口有大石壁立上下各有六十甲子字故名宋端宗自閩航海嘗駐於此

逍遙巖

[河源]縣南源廣幽靜宋進士何天隱闢明成化中邑人邱隅居之益以嘉禾美箭異石奇卉引泉為池其西有栖賢寺

牛鼻山 縣北南越志云山去赤岸四十里西有夫廬山有湖冬夏常盈每至甲戌嘗聞歌管鞞鼓之音

平陵山 縣西中有滴水巖又有通海巖空洞而暗以火照之乃見有石水注於竇沉沉有聲深不可測

山峯嶂 縣東北尖峯如筆下有石穴盛夏無暑隆冬溫然巔有二石平坦可坐數十人天然棋盤相傳仙人弈此產仙茶味極甘美

瀝湖 縣上城東門外明萬曆分守道鄭邦福知府林國相邑人李燾請於制府陳渠捐金加厚萬年基二丈餘以瀝湖水

爲衛城之計一名制府湖

浸珠湖

縣南縣山龍脈由此過峽名雙龍夾脈又曰養龍池

明萬厯己酉縣治遷建於此驪龍吐珠李壽易其名曰吐珠

泉

循江 縣北卽新豐江寰宇記云循江一名河源水自虔州雩

都縣入龍川在河源縣有龍穿地而出卽水流也按隋書地

理志河源縣有修江當卽循江修循字體相似而誤耳元和

郡縣志隋開皇十年置循州取循江爲名可證修字之悞王

象之輿地紀勝等書分修江循江爲二水謬矣

龍穴山

龍川縣城北漢書龍川縣有龍穴吳都賦目龍川而

帶垆者也南越志云聯巖亘地累嶂分天常有五色龍乘雲

出入此穴

白雲洞

縣北白雲常聚其上故名一曰白雲山宋韓京有詩

龍臺巖

縣東巖下爲寺寺前有池相傳有龍蟄焉巖左有石

刻云宋紹興十九年二月乙卯建州觀察使韓京守循率賓

僚勸農於此

敖山

縣北一名嵒山輿地紀勝云有三潭龍藏焉東有天厨

峯西有天柱峯其上有嵒峯書院遺址

霍山

縣東北秦時有霍龍者龍川人避亂隱此遇真人授以

金液還生丹功成仙去後人因以霍名山山頂高七千七百

七十丈周三百六十里峯巒聳秀凡三百六十可居者七十

有二多海中草木上有石壇唐曹松明施儒鄭達有詩

大雪小雪二山

縣西北隆冬積雪彌月不消宋韓京有詩

東江

縣北卽龍江漢書地理志注引裴氏廣州記云本博羅

縣之東鄉也有龍穿地而出卽穴流泉因以為號

○ 熬湖 縣西北湖中有水心寺環以蘇堤宋蘇軾有詩

趙佗井 在今光孝寺二門少西昔堙今浚其泉清冽唐韋昌

明有越井記

東山 和平縣東形如豎旗古讖云東山成市公卿立至

仙女嶂 縣東上有奇石形如仙女旁有數足跡歲旱鄉人祀

以牲醴而以牲毛血和泥沙塗其跡須與雲興雨至洗去泥

沙方止至今有驗

龍歸巖 縣西南巖內昏黑入者秉燭循水而行寬處可容五

人狹處纔二人約十里有旁孔名石舍又十里有正孔名中

管土人云春澗巖中流出竹木皆白石舍中管來竟不能窮

其處也明嘉靖六年推官李喬木征峒賊至此秉炬入三四

里照見壁間有景炎元年龍川主簿嚴某題一絕句模糊不

能讀

羊角山 縣北相傳山有金鼓聲金則兵起鼓則兵息明正德

中征池大鬢嘉靖初征曾蛇子屢有驗

泃溪水 縣西北一名和平水亦曰上中下三泃水龍川長樂

龍南安遠四縣交接之道閩廣江西潤澤之區王守仁云三

泃之地守之足以控諸賊之咽喉不守則為狐鼠之窟穴蓋

以山溪深險故也

白羊潭 縣南淵深莫測巨石巉立水中相傳有白羊顯靈跡

於此

雲鬢巖 長甯縣西遠望若螺髻然上有石洞洞內有銀牀玉

几清泉湧出瀑布如練相傳昔有樵夫遇仙姑於洞口故又

名仙女峯

嶽城山 縣東北峭壁四周若城垣然中有香爐仙跡相傳宋

白玉蟾煉丹於此

雪洞山 縣北中有大小二峯嶺南地煖獨此二峯春猶積雪

虎跳潭 縣西澄波潌洞深莫可測春水暴怒山鳴谷應舟不

敢行其中有高唐石石床丹竈在焉

聞慶嶂 永安縣東舊名紫簾嶂宋帝昺既航海丞相文天祥

收敗卒屯此嶂夜聞黃鸞鳴遂徙南嶺因名其塞階石尚存

南嶺 縣東南宋末文天祥收散卒自聞慶嶂徙屯於此後人

呼爲忠臣嶺嶺上天祥手植桂樹猶存又天祥軍中夜無燭

命採生竹然之火光照入至今土產江南竹卽當時所然者

梅花嶺 縣西五嶺攢聚狀如梅花故名有巖十尋路甚狹隘

累足而入宏邃高曠遠望無際

琴嶺 縣東其狀如琴琴江得名於此

高洋水 在南嶺下一名毒水飲者多死相傳唐時鄒太尉督

兵至此士卒中毒祝天遂止至今泉氣如呼吸隨出隨沒而

水不流 按唐無鄒太尉祝者或天祥之偏裨鄒鳳也

聖跡巖 連平州東北洞口崎嶇中深廣容五百餘人上竅虛

明可以遠眺有水不涸洞後有徑直出藍州土人避兵居之

一名避世巖四時有燕巢於內又名燕子巖宋韓京有記薛

世瞻魏科杰何琛有詩

九連山 州東高二千餘丈周五六百里東連龍川河源南連

博羅增城龍門從化西連翁源英德北連龍南環通九縣因

名明正德中三剽餘賊屯聚此山四面峻險惟一面可上巔

撫王守仁設計克之

仙人山 州西高峯千仞嶂如列屏頂一巨石平如砥有仙人履跡

大嵩徑 在縣野鴨潭逕口導九蓮水出油溪四時花鳥不斷恍如桃源谷口有巨石壁立峭拔明河源進士李中丞壽磨巖題曰大嵩逕

黃牛仙石 縣北前峯插雲傳爲漢曾袞修煉處石頂餘址猶存

石人嶂弈跡 縣城北石立半山如人狀其上端平可坐有對弈仙跡

撐腰石沙洲 縣南石高數丈臨涯如柱水深無底中一沙洲清澄可鑑科年遇浮水面入闌多雋諺曰水在沙洲鹿鳴呦

呦

潮州府

金山 海陽縣北一名金城山有金姓者居之故名宋祥符間知軍州事王漢始闢其勝漢有記山巔名獨秀峯有西暉鳳凰二亭及隱石仙遊洞諸勝元末廢明萬曆間知府徐一唯建石坊曰東南最勝右有金山庵庵西有巖瞻臺下有伏虎石明總兵官俞大猷爲之銘臺後石刻拙窩二字又刻周敦頤拙賦於其上右有石數峯其清暉同趣四字則元至正間總管王翰筆也最上有橋曰橫鶴後有超然臺副使任可容建上平坦可坐數百人

韓山 縣東亦名筆架山下有韓文公祠祠左有侍郎亭亭左有宋陸丞相祠祠左有寧波亭文公祠旁有木郡人以其花

之繁稀卜科第盛衰因名韓木山下有韓江宋陳堯佐劉允有詩

湖山 縣西北其陽有湖故名又名銀山與金山並勝唐貞元間御史中丞李宿建觀稼亭於其上宋元祐間知州鮑粹訪其遺蹟重建為閣左右建二亭曰乘風待月慶元間知府林鏐濬古放生池而跨以橋淳熙間知州劉希仁更放生池曰惠愛沿堤而上建亭曰晴雨菴曰止水立華表於橋東建虎拜亭於湖南道旁今俱廢惟雁塔石仙人跡尚存

九郎山 縣東北起伏有九故名寰宇記云縣有九侯疑即此海洋山 縣北南望大洋晉名縣以此桑浦山 縣西南山勢蜿蜒產茶北麓多桑故名其巔有塔旁有井秋冬不竭

獅子山 縣西南以形似名上有石巖在其巔廣一丈宋嘉定二年建石浮屠曰獅子塔

甘露巖 縣西南相傳有孝子廬墓於此而甘露降故名西湖 縣西南湖山之下宋慶元間知州林鏐開濬湖心有亭歲久湮沒宋許騫有記

東湖 在韓山之後四山迴環荷花彌望柳陰夾植湖中亭曰湖山觀曰清暑曰水月曰友堂
意溪 縣東五里舊名惡溪又名鱷溪嘗有鱷魚為患唐韓愈作文以驅之宋咸平間通判陳堯佐亦斬鱷魚於此有戮鱷魚文

東山 (潮陽)縣東韓昌黎嘗遊於此
白牛巖 縣東南巖中有泉曰卓錫唐大顛禪師居此明吳紹

宗有記

白嶼 縣北郡國志潮陽有白嶼自海浮來後會稽人姓丁識之云曾藏銅熨斗於洲上往取果得

曾山 縣西雙峯並峙航海者望以為表寰宇記山多文具可以解毒

河山溪山 縣北上多草木鳥獸石巖天成無路可通僧大顛闢之

錢澳山 縣東南為海船灣泊之所宋文天祥嘗登此以望帝舟其北曰鍾南山臨於滄海之上有石曰鎮海將軍西有牛角睡虎伏龍等石及宋元題刻

大湖山 縣東南南臨大海下有龍潭韓昌黎集有祭龍潭文即此

靈山 縣西少北唐僧大顛居此下有卓錫泉山頂有留衣亭後人因昌黎留衣於此遂建亭焉

麻田山 縣北宋逸士吳復古隱此有遠遊菴東坡為之銘山有蟹眼泉飲之可以已疾

西豐水 縣西郡國志水中有銀石臨水穴中有銀瓶不可取黃岐山 揭陽縣北上有石湖四時不竭絕頂有石浮圖下有

二巖東巖曰竹岡相傳宋邑人陳希汲讀書於此元祐中舉經明行修第一目為廣南夫子故又名陳夫子巖西巖曰松岡有石門石室諸勝

梅岡山 縣東北挺拔秀異有石刻梅岡第一山五大字

菱池山 縣東南三峯插天中有深池數十畝林木巖泉之勝甲於境內下有石巖形如獅子可容千人以杖撞之傳聲響

應

貴人山 縣西北相傳隋時義安郡丞陳洪留居於此洪子政以武功著政子元光鎮撫漳潮贈豹韜衛大將軍鄉人以陳氏累世貴顯因名其所居為貴人山村曰貴人村

仙徑山 縣西形如覆盂其麓有竇僅容人行行數十步空洞寬敞莫窮其際中有流泉相傳為古人避世處

瘦牛嶺 縣西一名雲落山舊傳有銅鐵佛像寶貝之類宋黃公度楊萬里有詩

石頭溪 縣西南溪中有石截江而渡其形似馬激潮怒濤聲聞數里龍鼉多伏其下

雙溪口 縣東南南北兩溪會於此明天啟間海寇闖入乃填石於溪中以扞賊舟凡七堆名為七星石

鳳凰山 饒平縣西北高六百丈綿亘一百餘里為一縣巨鎮

古諺云鳳凰山嘯西湖平代代出公卿

尊君山 縣北狀若朝士執笏故名山阿有尊君菴

蓮花山 縣西南山巒五開如蓮花故名宋潮州士人陳肅講

學於此明邱世鑰有詩

留嶺 縣東相傳仙人牽牛度此今石上有小牛足跡

九龍潭 在半徑村相傳昔有龍潛於此禱雨輒應

虎頭山 惠來縣東兩石夾峙如門其中空洞外望若虎之昂

其首

光華山 縣東元末兵亂土人結砦於此

石牛山 縣西元末趙師王據山下今遺址尚存

普陀巖山 縣西北旁有廢寺舊址相傳唐僧大顛隱此夜聞

海潮聲遁去至今山中荔枝百株其手植也遺一飛來鐘追
蠡僅懸其年月日不可辨

千秋鎮山 縣西宋處置使鄒瀨嘗駐兵於此勒銘石上

透龍湖 縣西北周三十丈深不可測相傳雷震地裂遂成巨

浸

雙髻山 [天埔縣南中有石室可坐百人唐慚愧禪師曾住此

鳳翔山 縣西為三河新寨主山寰宇記一名翔鳳山昔有爰

居來集因名下有鳳凰水山多相思樹樹中有神形如人被

髮迅走山海經云南方贛有巨人人面長唇黑身有毛反踵

見人笑亦笑唇蔽其面因即逃也郭景純云即臯陽

銅鼓嶂 縣南古為賊巢明崇正辛巳間鍾陵秀據此

陰那山 縣西五峯連峙狀如火焰俗名五指峯下有陰那坑

出泉清冽

蛟潭 縣西北其深莫測相傳昔有蛟孕其中後來風雨騰去

皇子殿山 [澄海縣北舊名龜山一名覆盆山又名北殿山相

傳宋太子過此設行宮故名

蓮花山 縣北山勢排稟奔放五峯巘岬若蓮故名又名白石

山絕頂一玉井腰有天池細流涓涓出石罅中百花洞在兩

峯巔岩間懸崖古松如虬盤洞口瑰異萬狀

鳴洋 即大洋聲起若雷東風西雨海人候之

飛錢港 縣北相傳有錢飛水上故名

烏山 [雷甯縣]距縣三十里峻壑幽林烟澹曲折路轉峯迴引

人入勝上有石室擴為梵宇曰烏山巖

馬嘶嶺 距縣四十里上接懸崖下臨深澗前有巨室若蹲踞

及侍立狀又有石橋通前山之阜環巖皆老樹古藤穿雲遮日流泉直通齋厨相傳為唐大顛初創道場

望夫石 距縣五十里疊嶂層峯直插雲漢絕頂有巨石即望夫石也水簾百丈懸空而下

飛泉嶺 [豐順]縣南壁立萬仞周數十里層巒疊嶂有泉飛空而下如瀑布因名宋朱晦菴過此書落漢鳴泉四大字於嶺並有詩云梯雲石磴羊腸遶轉壑飛泉碧玉斜一路風烟春淡泊數聲雞犬野人家嶺巔有石塔嘗吐氣如雲黑主風白主雨

鷺公髻山 在羅家約山下有泉泉分流清漣可愛內一泉獨濁呼為汶水岵山形隆起如鷺髻故名

龍嶂山 縣西上有九十九墩墩狀各異虎豹龜蛇為類不一

頂廣二十丈盤繞如龍土人稱為九十九龍嶂

溫泉 縣西北有泉從地湧出可以熱物

肇慶府

定山 [高要]縣城北一名石室山唐天寶六年改為嵩臺山南越志云縣有石室自生風烟南北二門狀如人巧意者以為神仙之下都因名為嵩臺山中有石燕唐李邕有記鏤石存焉連屬有七星巖一曰石室巖一曰屏風巖一曰閭風巖一曰天柱巖一曰蟾蜍巖一曰仙掌巖一曰阿坡巖列侍如北斗狀

寶月臺 縣北平地突起高二丈周一里望之如臺宋人建星巖書院於其上今廢

王侯峯 縣東南宋元豐中郡守王泊葬其下因名

北嶺 縣北七星巖後峯巒連屬若屏嶂然中一峯雄峻名將軍嶺蓋石室之支阜也其前爲雙源洞有泉自石根出掬之微温多敗葉流出旁多怪石相傳銀盒覆其下

石洞 縣北巖穴幽邃南北二門上虛通天與星巖相去不遠西水泛漲巖之沒者數丈惟洞隆然屹立水中世傳其洞能浮

小湘峽 縣西群峯列岫連延環繞水經其下多良材美竹宋皇祐四年儂智高犯端州州守李寶臣曰若得兵數千伏小湘峽可必勝也見陳桎續通鑑

高峽山 縣東卽高要峽與爛河山對峙江流至此夾束而出相傳山有羊化石因名羚羊峽又名靈羊亦名零羊古有峽山寺唐沈佺期峽山寺賦稱端溪妙境卽此元范梈有詩

苟徑山 縣西南相傳爲陳高祖攏掘鑿之處砌石存焉見輿地紀勝

頂湖山 縣東北產茜草上有湖四時不竭山半有白雲古刹遶寺產佳茗有龍頭石大窩坪羅漢橋涅槃盤臺石飛水巖諸勝道書以爲第十七福地

爛柯山 縣東南峯如卓筆一名腐柯山又名斧柯山郡國志云昔有道士入山採桐爲琴遇赤松子安期先生問答而斧柯爛後人鑿爛柯處三大字於石上其麓二石巖產端硯之所

騰豻山 縣西北山勢險峻南越志云騰豻沐猴之類頭正方髮長尺餘色類犬似人髮常覆面欲有所視輒搖頭兩手披開之

勞山 縣東山徑險狹樵者勞焉因名

銅鼓山 縣西有赤石如鼓扣之有聲故名久晴山色冥黑則

雨久雨山色鮮露則晴郡人以爲陰晴之驗

東沙州 在羚羊峽之東一名中心州卽宋包拯擲硯處

洗硯池 縣西北宋郡守包拯所鑿

包公井 縣東宋康定間郡守包拯所鑿

金岡山 四會縣北一名金山出金沙廣州記曰縣有金岡行

人往往見金人於岡側上有登金亭又有濂溪書院今俱廢

鳳翔山 城東邑人以科第顯者多出其下俗名社山

倉岡山 縣西林巒聳秀舊傳僞漢劉氏常建倉貯兵儲於上

故名

鳳頭岡 城東北宋淳熙丁酉邑宰蘇邦平縣基得古碑乃鹿

鳴燕士詩有龍嶺行歌龍已化鳳頭將見鳳齊鳴句見輿地紀勝

烈女山 縣西南輿地紀勝云昔有貞女許嫁而夫死於虎女

歸夫家父母欲奪其志乃潛遁此山求之莫知所在傳以爲

仙去

思子山 縣東輿地紀勝云隋末藉民爲兵有嫗止一子亦預

後思子登此望之悲哽而絕故名

扶廬山 縣東上有湖四時澄澈花木繁茂相傳甲戌日有管

絃音昔六祖嘗隱此以盧姓故名下有六祖庵今廢

石澗山 距縣六十里有泉一穴舊傳穴中有巨鯉每游泳不

數日必雨見輿地紀勝

祀山 縣境寰宇記云嘗聞笙歌之聲以爲越王之靈

烏龍潭 縣西潭底石隙中產佳魚味如江鱒宋李時中詩云
烏龍潭下鮮魚酢白馬山前苦笋羹

龍山 [新興]縣南蜿蜒如龍山有龍山寺為曹溪第六祖盧能
托生地其故居即寺前地

天露山 縣東南輿地紀勝云山有巨石泉出其旁深丈餘魚
物其中

利山 縣北南越志云山多沉香木

思防山 縣東北山形峭拔登之則防阨危

觀江水 縣境寰宇記觀江水沸騰流水沉淪必無出者名曰
河伯下封

三章溪 縣境南越志云允吾縣有三章溪溪有三源案允吾
即臨允新興為古臨允縣地今三章溪之名不見記載 大

清一統志云新江有三源曰裏洞曰筆架曰龍山或即古之
三章溪也

射木山 [陽春]縣東南巍峩蒼鬱一名雲靈山雲幕其上則雨
開則霽諺云晴不晴看雲靈

崆峒巖 縣西石壁穹窿半巖開一穴若洞門內深廣分前後
洞透光生明中擎二柱石下懸若倒垂蓮肝肺狀者甚多常

有水滴風颺之若雪花散落其凝成於下者可研為粉名石
乳粉前洞有龍牀上皆靈芝狀後洞皆白石瑩淨如金銀而

常濕且多蝙蝠及石蓮子入者須以火右有懸石二扣若鐘
鼓聲號石鐘鼓再入則半壁又開一大竇而明生焉攀躋而

上仍可外望遠視其得名以空而有洞故也

鐵坑山 縣東南山盤旋產鐵宋胡銓游其處有詩

馬鞍山 縣東南山頂有古瓦盤內載清泉登者掬飲將半次日復滿雖積雨不溢若有心尋求不可必得

三妹山 縣境輿地紀勝云劉三妹春州人坐於巖石之上因名

鸚鵡山 縣西南有巨石如鸚鵡明萬曆辛巳大雨山裂下成深潭又有奇石削八面者無數光瑩端正亦一異也

銅石巖 縣北西南有巖高三四丈深廣丈餘前有德慧禪寺上半壁平處有周愔頤祖無擇題名宋胡銓有詩

將軍岡 縣東岡巒起伏宛如波浪唐姜晦貶春州司馬嘗提兵陟岡禦獠賊因名又輿地紀勝云唐時有李將軍屯兵於此

雲浮山 縣西北高百餘丈雲浮水出其下一名泉山輿地紀

勝云陳霸先曾居此山上有偃松石牀舊基猶存

巨石山 縣西北南越志云山有二石室有懸泉飛瀑金膏銀燭靈芝玉髓之異其石自然成樓臺柱棟

連石山 縣境寰宇記云連石山至於重陽四晦則雞鳴雲中木柵水 縣西水清而急東北流穿巖底過一名甘婪水郡國志夷語以穴為甘以穿為婪甘婪者中州所謂穿穴也

慶林山 高明縣城北一名春富山明嘉靖初縣中大疫百姓建醮山巔鼓角喧闐時適知縣陳坡初任遣使持牒至壇宣

讀不許竟醮其辭曰疫為沴氣鬼或憑之非誣然聞為善忠孝讀書之家皆不入家有長邑有令一也而入吾邑者罪在

令令宜死不死令是鬼越法橫入罪在鬼文到亟去去不亟旦日吾請之上帝是夜邑中聞鬼哭奔竄病者皆愈自是每

陰晦夜山巔輒有光焰直射縣署及坡任滿遷去光乃息

歌樂山 縣西輿地紀勝云風起聲如音樂

文儲山 縣西羣峯峻嶒有飛泉漚而成淵名曰聖潭

范州水 縣東元初府東南之北港自府界羅鬱港引大江入

境鄉民病潦至元四年塞之以港為魚池內潦無洩新羅范

州都復受其害明萬曆辛巳郡守王泮因民之請通港設寶

名曰騰蛟港以港口魚埠十一梧州渡二與寶坦市廛永給

修港之費自為記萬曆丁亥郡守鄭一麟濬港通水建閘設

橋亦自為記

官棠水 縣東舊通大江元至正中泛溢為害因築塞之

龍鼉山 [恩平]縣西寰宇記云山形如龍下有龍穴往往輿雨

云是鼉又名鼉山中有龍潭號聖水東面有穴清泉瀉出名

曰水磔

碧雲島 縣西澗從石落高約二十餘丈下注為池池畔有釣

魚石平衍能容十人仰觀飛瀑若捲簾然壁間時有五色虹

文隱見左上小壑曰謫仙宮一蘿倒垂如畫而天漿滴滴自

苔而落池前一石隆然負古木而起若雲屏然水流曲折而

東兩山東之懸崖絕壁莫可攀躋循澗而出十步一池池石

奇磊萬狀

石圍口山 縣西北卓立江口巖巖峭絕石壁刻元至正癸巳

學正鄭文趨撰記字蘇蝕多不可曉

鴻嘴山 縣西北上有雙石頂綿亘數十里昔為賊壘明嘉靖

丙辰征雙石頂即此

雲岫山 縣北舊有雲岫營接新興界明嘉靖三十五年征良

塘巢即此山

灣雷海 縣南海勢灣曲潮聲如雷蟹戶居之非大海也

福星山 廣甯縣北圓秀如覆金城跨其上

落鞍山 縣西明統志相傳有青衣人乘白馬出山中俄墜地

人馬俱失因名

圓嶺山 縣城北有九十九坑皆相似若失道必三日而後出

潭圃山 縣東南連山險峻至此甫平縣初建於此尋移今治

水槽嶺 縣東南唐羅隱南游過水槽嶺渴甚鑿石得水書清

涼池三字於石上

石燕山 縣東巉巖多窟穴有石鐘石佛秋燕多蟄其中

烏龍潭 縣西多魚味甚佳

北嶺山 開平縣南一名北立山產白雲茶脈自恩平北來與

羅漢山相接明嘉靖三十二年僉事杜聰敗賊於此

獅子山 縣東北為一方險要之衝明成化中僉事陶魯於此

徑中立營開塹數百丈以禦西寇

梁金山 縣東相傳道人梁金修煉處

薛公巖 縣東北獅子山後一名寶光巖又名寂感巖上有石

室深一丈五尺濶八丈有二泉出於石如乳冬夏不竭

香山 德慶州城北為州之主山一名利人山產五色石上多

香草

端山 州北其形端正故名方輿勝覽云有樹冬榮其子大如

杯炙而食之味如猪肉

錦石山 城西上有石柱直插霄漢漢陸賈使南越尉佗與之

泛舟至此賈默禱若佗肯稱臣當以錦裹石謝山靈使還遂

募人植花卉代錦後人立祠祀之見宋洪邁茂堅志一名濯錦山

都計山 城東北相傳昔有仙人騎鹿遺跡

三洲巖 城東一名玉乳巖宋李綱書玉乳巖三大字有石室懸乳皆蒼綠色自成觀音像石鐘地鼓擊之有聲巖內空洞可容數千人由洞至巔古今題詠甚多宋周敦頤題云濂溪周敦頤茂叔熙寧元年戊申季冬二十六日遊蘇軾題云東坡居士自南海還來遊武陵弓允明夫東坡幼子遇叔黨同至元符三年九月二十四日也宋祖無擇有銘元戴貞甫明陳獻章邱濬區大相有詩

焦石山 城東北山出焦石每歲人採之琢爲燒器見寰宇記又名社山

定林山 縣境山下有石方正似牀其旁羅生韶子堪食又有金林山一名思黃金山里人有岑班者入山採伐遇一寶珠徑圍五寸始爲石遂取以還及夜光明照耀舉柵朗然里人甚懼以火燒之光雖損頓更明徹猶照一室如白晝客有請之千金遂秘而不出見寰宇記

書堂水 州東宋石處道讀書於此因名

陸溪水 州西舊有陸賈廟故名

夫號水 在州東出西源山其東十里爲思夫水亦出西源山並流入江相傳昔有人行役歲久不歸其妻思之哭而死夫歸未及家十里聞其妻之哭死也亦號泣而絕鄉人呼其村及水爲思夫號云

靈陵水 城東卽程溪水一名零溪水又名溫水水口有龍母

廟漢建祀温媪封為龍母明洪武初封為程溪龍母之神

東山 封川縣東形如屏障一名挂榜山輿地紀勝云舊於山

下建三學

西山 縣西南即錦錢山旁有石丈餘上有巨人跡遇旱以水

洗之即雨

封門山 縣東北峯巒秀蔚兩崖如門下有靈鼠石鄉人祀之

歲不害稼

崑岡山 縣東北一名班石山其石五色故名山有風穴類苑

云風出蒼梧者草多芳蘭

豐壽山 縣東北一名霹靂山相傳山有巨石雷震其一故名

上有石池泉水湧出遇旱以其水禱則雨

麒麟山 縣北寰宇記云以居人莫麒麟姓名名之

白馬山 縣北石坡甚長飛泉如練明正德中獐巢其上參議

周用等討平之改名白鶴山

姚公石 縣北舊經云昔有人姓姚居之

靈洲 縣北上多蘆葦鳧鷖所棲潦水泛漲其洲不沒古傳與

水為浮沉因以靈名

昭埔山 開建縣東上有鼠石旁有三穴可容人居止其石上

時多石斛見元和志

忠謹山 縣東北舊經云古人居此多謹直之言因名上有白

鷺池廣圓十里四時不竭

石室山 縣東北萬石巍峩有如軒庭者有如奧房者亦名萬

石嶺相近有石壁山亦以羣峯峻削而名

龍吟水 在縣金縷村莫狀元讀書堂山間水聲清響人呼為

龍吟

狀元井 在忠謹山下井水清甘冬夏常滿因唐狀元莫宣卿得名

鶴山 鶴山縣城內其形如鶴因名置縣時即以名縣知縣劉繼構亭其上顏曰鶴頂

三寶山 縣西相傳有珠光三炬山人往往見之故名產礪石雲粟山 縣西寰宇記南中風土惟稻無粟此山種粟即成因

烏臺山 縣境為洗田四景之一萬山環繞一峯獨秀昔有仙人芳躅高人韻士每多題詠

石瀑岡 在縣坡山危石飲流奔濤齧岸其東澄江如練一瀉千里宋蘇軾謫儋過此留止旬日居人築亭以記其勝

七襄潭 在龍眠村黃沙窩坑有水潭大小七處形如甕口晴

久內響如銅鼓則雨久甕響則晴靈驗不爽

龜齡井 在龜山下石竅出泉冽而甘明縣令丁積嘗憩山寺

勸諭里民鄉人感德因嗜此泉易名留澤泉

高州府

廟岡山 茂名縣東舊立廣利王行宮於此

仙山 城西南寰宇記云潘茂名昇仙煉丹處上有昇仙觀又名昇真山一名觀山

東山 城東一名潘山山前有潘仙坡亦道士潘茂名煉丹之所中有石船丹竈

南宮嶺 城南為縣南水口砥柱明王湛有南宮嶺晚眺詩
仙井嶺 城西北鑑水右旁有井世傳潘茂名煉丹仙坡烟從

井出故名

銅魚山 城東與郡治相對賴仙翁作高涼風土歌云一條丁水銅魚寨三十年來舊相識見輿地紀勝山下有石井相傳井内生花是年必有登科第者

射狼山 城東北寰宇記云古老相傳昔有人射白狼於此

寶山 縣北形如圓珠故名圖經云有麀鳴則赦書至

龍湫山 縣東大小二巖聯峙有石室可容數百人曲折窈冥最為奇勝巖前石壁有宋人鐫記云高涼郡東三十里有洞曲折數百步巖絕異態其下有泉曰龍湫交流石間籟發如湧雲之狀巖木蒼鬱殆非人境明姚繼舜有記

高涼山 城東北圖經云羣山森然盛夏如秋因名

波浪山 縣界岡壟如波浪古老相傳海沫成山見寰宇記

武壇山 縣西輿地紀勝云其山圓淨如將壇

毛山 在寶山東晉邑人毛方隱此得服氣之法自少至老兩頰皆丹凡風雨水旱豐歉預以告人無不驗者

筆架山 縣東南三峯高聳形如筆架又名文筆山明知府孔鏞創潘仙亭其上遺跡尚存

鑑江 縣東北源出鑑山其水澄清如鏡故名

南洲 縣南霧嶺岡下有湖水方廣二里唐天寶二年因大風雨湖心忽湧出小洲至今生草木見寰宇記

龍灣井 縣東北古老相傳有龍蟠於此異跡尚存

流連井 縣東北室山賴仙人歌之室山流連井久立方知省見輿地紀勝

思前井 縣東寰宇記云潘真人煉丹之水味甚香美煎茶試

之與諸水異力士奏取其水歸朝

響水山 雷白縣西山有高溜下流琮瑋故名

文字嶺 縣西與雙木山連山岐交加若文字然

洲山 在縣西南海中又西為放雞山航海者皆以雞祀焉

帽澇山 城西北寰宇記云當元陽山有雲如帽即雨下即帽

澇水

龍潭山 縣北即龍陣山世傳有龍潛於此故俗以龍旬呼之

禱雨輒應

熱水山 縣西下有泉湧出熱如鼎沸上有石牀長二丈餘廣

七尺刻浴沂石三字浴溫泉畢多卧其上萬歷初年泉忽涼

冷越八十餘年有過客云陽鬱為陰熱鬱為寒宜瘡導之三

日後復溫

題字嶺 城北上有巨石卓立如牌字跡隱隱旁有馬蹄痕相

傳仙人乘馬題詩於此土人呼為馬踏石

要龍山 縣東與雙甌上連賴仙翁作風土歌云巧妙四山雲

岫落要龍雙甌月燈明見輿地紀勝

浮山 縣西北寰宇記云堯時洪水洪溢此山獨浮居人得免

沉墊面上有湖一名湖山

羅浮山 縣西北白石峻峭世傳為仙人牧羊所化

鹹水湖 縣北四水皆淡一湖獨鹹說者以為地竅通海

龍山 信宜縣東山勢險峻南有石孔約深五尺許謂之風窖

北亦有石孔其深莫測謂之甬窖相傳有龍伏其中

大間山 縣西北界於茂名信宜之間故名中有石室又有石

牀丹竈及巨人跡世傳昔有樵牧者見二叟偉服綸巾數至

其室俄失所在

趙山 縣北形勢險峻元時有獠人趙姓者依山而居故名頂有巨石雨後每出翠雲

白馬山 縣北相傳有白馬隱見其上鄉人以為神遂立白馬廟於錢排石崖中產七根毛茶

思賢嶺 縣西北一名歐嶺元時有歐姓者居此因名

雲黑嶺 在東滂甲與虎跳相對上有陳太保馬路若遇陰雨聞炮響與鼓樂是年豐熟

羅竇洞 縣南舊唐書地理志竇州以羅竇洞為名水中有石笋聳起形如小舸明嘉靖中好事者名為小瀛洲

吐珠江 縣東北源出大帽山水中石檻層疊而下瀑布可觀雲哲水 在貴子三甲水中有石屋高二百丈疊三層中有窗

戶透日光

龍灣 在縣扶龍灣上浮一圓墩水深十餘丈世傳米價低則浮昂則沉屢驗

龍母山 [化州]城外東南隅一名南山輿地紀勝云南山起於雷陽至本州城外拱於州治之右上有龍母廟俗又呼為龍母山

石坑岡 城西南上有石高六尺周六丈左邊有文似龍形見寰宇記

石龜山 城西南上有大石形如龜扣之聲響若鐘

龍王山 州北周圍六十里上有天池相傳仙人羅辯騎白牛化為龍舊設龍化縣及辯州本此一名來安山

石城山 州西北中低四面高聳如城為州險隘明成化中湖

公威結寨於此一名古城山

鹿踏山 州西北山勢陡峻上有鹿踏仙跡

石碓山 州西北上有石如碓者五六相傳為羅辯煉丹遺跡

羅江 州東一名陵羅水輿地紀勝昔有陵羅二姓居二水之

濱因名

平源江 州東水勢平順故名江中有沙洲名驪珠臺俗傳州

為龍而此其珠也下有蟠鼉石

五級灘 城北自溫灘而上四十里有勾灘篔簹灘瀟灘緱灘皆

奇險總名五級灘

鳳井 城西一里濶三尺深一丈泉從石出久旱不竭

近信山 吳川縣西北相傳昔有仙棋客遊此

南巢山 縣西北昔有鶴巢於山樹故名

特呈山 縣西南山勢秀拔聳立海中明陳景廉有詩

特思山 縣西北圖經云峭然特起為名一名文筆峯

和尚嶺 縣界即望恩山宋天寧僧遇父於此故名

舊州湖 距縣一百二十里即唐羅州陷處舊傳有白牛出州

人剝而食之地遂陷今稱為龍窟禱雨取水於此

限門港 在城南三十里納三川之水於海兩岸沙堅逾鐵水

曲折而出舟極難行洵為天塹

硃洲 縣南屹立海中當南北道乃電化犬牙相錯處續通鑑

綱目景炎二年帝欲往占城不果遂駐硃洲

三台山 石城縣治後有三峯北城跨其上東連城外白霧嶺

西連城外迴龍嶺共為五峯聯絡如屏為縣主山

紅頭嶺 在城西為縣水口稍北有仙人竈石相傳為仙人煉

丹處

天堂山 縣東北元末民恃其險避寇於此獲免鋒鏑因名上有水泉不涸

招義山 縣西圖經云昔有譚氏招義兵於此聚會以討僭耳故名

九洲江 縣西北元和郡縣志廉江縣有龍化水即此其江至冬水淺沙渚露出有九故名

松明井 縣西南零綠海島中潮來則鹹潮去則甘冽如故

廣東攷古輯要卷八

山川三

廉州府

還珠嶺 合浦縣城東北舊有還珠亭故名

東山嶺 縣東十里昔人題為海角第一峰

黃姜嶺 縣東高五十餘丈漢董賢父恭徙合浦葬嶺下今人呼董恭嶺

白石山

縣東北山石皆白東坡云青水南白石北此地崔錢人不識即此

冠頭嶺 縣南形勢窮窿潮長撼石如雷相傳交趾黎王葬此

交趾人每年望海祭之

大廉山 縣東北東漢費貽為合浦太守有廉聲去日百姓追

送至此遂以名山山上有大廉洞元和志唐置廉州取大廉洞為名

蔡龍洞 縣東北輿地紀勝唐置蔡龍縣因蔡龍洞為名

夫人山 縣東一名賓山又名殯山寰宇記云廉州有殯山即宋陳伯紹殯妻處

姜山 縣東北唐姜神翊曾家於此故名

糠頭山 縣西北尉佗駐軍處居人舂穀積糠成山山若鳴則風颺立至見寰宇記一名狼頭又名軍頭山

百良山 縣東輿地紀勝云山自北州來林水深廣工匠求良材百不失一

五黃山 縣西北高五百餘丈綿亘數十里相傳昔有樵者迷路遇五人黃冠朱顏指示得歸因名俗呼為五皇嶺上有五

皇廟白鶴觀

廉江 縣北即合浦江明饒秉鑑詩云長江來浩浩何事得廉名自是源常潔因之流亦清浪浮雲影動波靜月華明寄語滄浪客於茲好濯纓一名晏江

金雞水 縣東昔有金雞浴於水旁故名

南北湖 縣東北相傳馬援曾鑄銅船於此交州記云每陰雨輒見銅船出水

雁湖 縣西北每秋冬有雙雁游其間因名見輿地紀勝

張沐溪 縣東北輿地紀勝昔有隱士張沐居此因名

鐘灣 在縣南七里有灣接江通海宋政和間靈覺寺鐘一夕飛去既明懸空而下鐘猶溼人言灣中每夜有鐘聲謂必與龍戰寺僧鑿去頂上龍角乃止至今灣中風起有物大如車

輪藍色湧出波心

濶洲 縣城南一名圍州交州記云合浦有圍洲周圍百里其地產珠

珠池 縣東南八十里海中卽珠母海舊唐書地理志廉州合浦縣有珠母海郡人採珠之所宋蔡條鐵圍山叢談云合浦珠池大抵皆居海中珠母者蚌也採珠必蜃丁皆居海艇以大舶環池以石懸大絙別以小繩繫諸蜃腰沒水氣迫則撼繩繩動舶人覺乃絞取人緣大絙而上

六峰山 靈山縣城西其峰有六高聳如雲明林桂張岳林有聲有詩

三海巖 縣西一曰月巖一曰龜巖一曰錢巖其巖純石而內虛高曠如堂室石乳下垂欲滴又如繆絡之狀宋陶弼有序

朋張岳林長存有詩

穿鏡巖 與三海巖相接翠屏聳立中通一竅恍如穿鏡

射鶴嶺 縣東南相傳昔有人於此射鶴隨爲神故名

林治山 縣西南輿地紀勝古金坑之所前輩詩云天涯亭下有龍窟林治山頭出碎金

狼濟山 縣西南上有石室石門石橋外有兩石人夾峙名狼濟石唐甯悌原讀書於此

西靈山 縣北一名豐子嶺接元和志豐子嶺在欽江縣北又曰貞觀十年移南賓縣於峯子嶺下卽豐子嶺也九域志靈山縣有豐子嶺輿地紀勝峯子嶺爲縣主山又曰西靈山在欽州西北一百餘里貞觀十年移靈山縣治此是西靈卽峯子也明統志西靈山在縣西一百餘里峯子嶺在縣東北二

十五里分爲二山誤

紫水 縣南城外有井出紫水云科第之兆明萬厯間填塞建

儒學於其上

仙人井 縣北大東山巔四季不涸味極香冽

雷州府

英榜山 海康縣城西原名英山梁開平間都知兵馬陳襄駐

師於此出榜示民因加榜字

討泗山 縣西北昔有苻氏名討泗獨居此山故名山多竹木

之利

擎雷山 在城南八里雷震破成水見寰宇記

烏蛇山 城北寰宇記山出烏藥里人呼藥爲蛇故名

英高山 城南兩峯高峭相並而立頂有石穴湧泉

思靈島 城東十里海中寰宇記云有木豆葉如柳花如金豆

一年種數年收淮南子豆之美者有木豆是也

擎雷水 縣南寰宇記梁時移州於擎雷江源卽此

羅湖 縣西湖之先爲甯托二村有白牛至宰而食之村陷爲

湖惟老嫗不食存焉因名陷湖湖深無底大旱不涸淋雨彌

月亦不溢相傳有欲開此水以灌田者鑿渠及水越宿而水

下尺許人以爲奇今名西湖

卵洲 城西南海中舊經云群鳥伏卵於上或船過取其卵有

鳥千萬飛隨十里

瑞星池 縣南卽寇萊公之故居宋天聖中有星隕於此池因

名明成化間知府魏翰鑿池於寇池西亦曰瑞臺

樓前井 城內蘇頲濱舊祠側宋時濬蘇舊寓此有讀書樓人

多慕而汲之

萊公井 縣城外西館內相傳寇萊公所飲元祐間重浚扁曰萊泉案輿地紀勝有相公泉引李師中詩云海畔忠魂不可招周公辛苦賦鷓鴣此泉不竭名長在千朝君臣鑒本朝疑卽萊公井也

甯海井 縣城南唐上元間浚又有神石井在縣城西宋郡守戴之邵品水以神石爲第一甯海次之

七星嶺 遂溪縣南高十餘丈嶺上又起小峯拱列形如北斗蘇東坡過此書其石曰七星拱秀

射馬嶺 縣東北相傳元平章阿爾哈雅提兵過嶺試馬射箭於此

湖光巖 縣東南初名陷湖宋靖康中有僧琮師居焉建炎三

年李忠定公綱來雷止其地手題湖光巖二大字勒之於石巖以是得名

七星巖 在湖光巖之南巖上有石洞宋進士紀應炎讀書處名曰樂懶巖

英靈岡 縣南陳時陳琪繼獲一卵一日雷震得一男養爲子名文王後爲雷神頗著靈異因名

清涼洞 縣東南俗名仙人洞中有丹竈禪牀或云仙人嘗煉丹於此

澗洲山 縣西南海中周七十餘里舊名大蓬萊內有八村其民專以採藥爲業

武樂水 縣西南相傳伏波常駐師於溪北岸
鐵杷溪 縣東南寰宇記溪有石似鐵杷因名隋開皇十年於

東岸建鐵杷縣

珠池 在縣西南樂民所西海中亦名樂民池自劉鋹置媚川都宋開寶以還遂置場司或採或罷明洪武二十九年詔採未有專官正統初始命內官傍池建廠專守防盜成化中遷廠郡城大為民害正德九年以無珠罷採其後御史陳寶奏革雷池太監嘉靖八年復採都御史林富奏止之

小遂山 〔徐聞〕縣南有海嶼曰三墩中墩有古樹甚怪下有龍王廟廟前有井名龍泉祈雨者於鹹水中取得淡水則雨立至

佛屠嶺 縣東北山頂圓平俗以為摩尼佛首故名
兜鑿嶺 縣東北亦名那迺嶺明嘉靖四年有鳳來於此旬餘乃去謫丞林應聰記其事

乞雨嶺 縣北頂有二古塚相傳有十二牧童共養一豕遇天旱鄉人求雨童亦於嶺上殺豕祀神雨大作及晴童不知所之鄉人招魂瘞之每旱祭其塚輒應

石馬井 縣東相傳昔有馬常夜食人豕為人追急入此井只留石形似馬故名
瓊州府

雁塔峯 〔瓊山〕縣城南尖秀如筆水環其下宋郡人姜唐佐始登第因名元至正間築雁塔亭於上明萬曆時墜三元碑於中峰故又名雁塔三元峯

龍文山 在府治後明知府林有祿培築
潭龍嶺 在城東北下有泉分兩臂並趨西南一泉中湧名曰卓錫相傳宋僧和靖卓錫於此蘇軾有詩

鋪錦巖 城南元蔡貞女死節於此又名鋪錦谷

西石山 城西一名馬鞍山上多石下有洞可容數百人泉出

清冽古傳有鼎石丹爐在挺峯之下西隅石基乃鄉人祈雨之所

扶山 縣東南山左有五嶺遞相擁護故名扶昔有陶公開之故又名陶公山道書以為第二十四福地

瓊山 城南圖經云瓊之取義蓋瓊山縣奉化鄉有瓊山白玉二村土石皆白似玉而潤種積其上特美所產檳榔尤佳其石如瓊瑤耳見輿地紀勝明邱濬有詩

雲露山 縣西南輿地紀勝中有三潭上潭林木陰森人不敢近其次二潭有小石如橄欖有竅可穿俗名橄欖珠歲旱禱雨多應

那射山 縣東南輿地紀勝云其人以射獵為生山下有息石初甚小歲久漸大鄉人祀以為神

東湖 縣東昔有巨室居此一夕陷為湖

西湖 城西有玉龍泉出自石竇寒冽甘潔匯而為湖一名頓

蓮潭 神應港 縣北輿地紀勝云瓊州白沙津番舶所聚之地其港自南岸屈曲不通大舟而大舟泊海岸又多風濤之虞王師

光祖欲直開一港以便商旅忽颶風作自衝一港尤徑於所開遂名神應時治熙戊申也

雙泉 城外東北隅昔東坡寓此鑿兩井號雙泉上有亭名洞酌東坡有洞酌亭詩紹興間李光瓊州安置居此九年再貶

昌化軍有詩曰曾是雙泉舊主人

惠通泉 縣東三山菴下宋蘇軾經此飲之味類惠山因名之
曰惠通軾有記今又名東坡井

清惠泉 縣北卽舊連塘井味甘冽明郡守倪凍所鑿建亭曰
清惠故以名泉

仙井 縣東石巖中深丈許四時常盈中有平石左刻貞元二
年右刻熙甯甲寅數字有詩蒙晦

蓮塘井 在城西南輿地紀勝郡城百里絕無水惟烈村有石
井諸村三五十里盡飲焉每以葫蘆負水歸其人經月不盥
洗每取草上露濡手拭面而已遇雨則擯榔樹下溜水甕中
雖久不壞

邁山 登邁縣東寰宇記隋澄邁縣以界內邁山爲名
獨株山 縣東突起一峯若樹枝然明姚履素有詩

方勝嶺 縣西漢伏波將軍屯兵於此征蠻得勝故名

萬歲岡 縣西頂有怪石形如列屏號爲聖石將雨則雲霧滃
塞下有清泉

雲賓谷 縣西山腴地幽泉甘木茂昔有處士吳濬隱此又名
迎賓谷

合嶺 縣東南明唐絹詩山勢來相合周圍枕碧灣瓊澄分兩
界天地設重關

北畔嶺 縣西南明時嘗議遷縣治於此

白石嶺 縣西南上產白石故名頂有深潭泉自石峯而下久
旱石黑必雨宋白玉蟾有遊白石嶺歌

澄江 縣南其水澄澈隋以名縣
博龍潭 縣南相傳明景泰天順間有龍起此水

鯉魚潭 縣南山穴湧泉瀦為一潭中有異魚如鯉取而烹之化為水

神頭泉 縣南舊傳有婦人騎馬至此地塌泉出今馬跡猶存俗呼馬蹄井

金雞嶺 定安縣西昔傳夜見金雞光彩燭天

黎母山 縣南思河生黎峒中劉誼平黎記云天將雨則祥光夜見望氣者謂南極星降此山又云婺女星現化下此山因黎婺訛為黎母又云故老相傳雷攝一蛇卵在此山中生一斐號為黎母食山果為糧巢林木為居歲久交趾蠻過海採香與之結婚子孫眾多方開山種糧圖經云島山四州以黎母山為主山特高每日辰已後雲收霧斂則一峯插天至申酉間復蔽不見所謂南極星芒所降之地也一名光螺嶺又

名五指山明湯顯祖邱濬王宏誨郭正域有詩

橋頭溪 縣西南明王宏誨詩云清溪如帶繞邨麓溪上橫橋

漱寒玉 三三五五往來通家住武陵絕塵俗

蓮井 城東門外味甘冽暑冷寒溫雖旱不涸

邁豆山 文昌縣南舊傳有一香鑪飛來歲久榕根纏裏鄉人祀之為神

銅鼓山 縣東古傳諸獠鑄銅為鼓懸之置酒以招同類仇殺相攻則擊鼓集眾後人於此掘得故以名山一說鼓為伏波征交趾鑄

湄邱 縣東北宋知軍邢夢璜世居於此

東猺山 縣東輿地紀勝云其鄉之民如猿猺然猺婦紡績吉貝布縷細密瑩白謂之布籠

焚艘山 縣西北平黎記云漢武發兵到雷州海岸造樓船渡兵過海上岸黎人不出亦無兵糧李將軍於瓊州海岸焚舟而回今號為焚艘一說漢樓船將軍楊僕征黎至此焚船登岸

七星山 縣東海濱狀如七星連珠明天啟時建塔其上其東有泉七孔晝夜混混不涸

石鼓井 縣北有六石環起田中宛若破成徑六尺許狀如鼓其土黑有泉湧出清淺可掬夏冷冬温大旱不竭

南塘山 會同縣南拱向文廟明時改曰玉几案

何魯嶺 縣東突起高峯東有石巖登之可望滄海名曰山海奇觀洞

多異嶺 縣東數山相連中多怪石上有井禱雨輒應

大塘水 縣南源出黎山分流瀦為巨塘水旱不竭中產蓮

陰陽山 樂會縣即今縣治平坡突起周七里山形奇偶相生

土木相半萬全流馬兩水環抱

印山 縣西北水漲若浮印然一名應山

聖石峯 在博敖港屹峙港門相傳古時海濤洶湧沙磧逼隘或南或北迄無定所海舟常有覆溺之患宋天聖中其石突見故名

西偏嶺 縣西北有龍見石狀如龍首山脊半里皆黑石峻嶒疊出若龍鱗然

風門嶺 縣西南跨萬州界山勢峻峭兩旁石壁如門諸黎出入咽喉之地上有瀑布懸流

萬泉河 縣西北以其納文昌會同眾水之流故名昔人曾此

飲馬亦名飲馬河

毘耶山 臨高縣西北寰宇記毘耶山頂有蟲似伏蛇俚人以蟲為毘耶輿地紀勝縣北有毘耶山神每黎人叛則神驅蜂以禦之官軍大破黎人

那盆嶺 縣南平地突起一峯高聳而圓狀如覆盆下有買愁

村宋胡銓謫崖過此有詩云北往常思聞喜縣南來怕入買

愁村

灘神崗 縣東南江中聳一巨石高廣二丈旁有穴昔人於此

砌壇祈禱久旱灘響必雨久雨灘響必晴

龍潭 縣西相傳昔有白龍出其中宋於潭側立壇祈雨元范

梈撰碑

霖泉 縣南泉白石孔湧出常有海蚌上浮鄉人樹木立石為

禱雨之處

澹菴泉 縣西宋胡銓南謫時常飲此泉味甘美里人因取其

號立石書澹菴泉三字

那泥井 縣西宋慶元丙辰大旱諸水皆涸有僧和靖指此地

鑿之得泉久旱不竭

螞蝗山 儋州州東平岡蜿蜒形如螞蝗俗傳漢時曾屯兵於

此後人每掘得銅鉞刁斗之屬地多鬼火陰晴出没蓋古戰

場也

凌霄山 州北峯頂圓聳下垂八足形如鱗魚土石五色舊多

松樹上有博望臺下有石巖宋高僧和靖仙人白玉蟾俱修

煉於此蘇軾有詩

龍門嶺 州西北海岸特起石峯兩趾奔海其狀肖門可泊舟

上有石穴中虛通海透風名曰風門相傳昔有蛇潛其間化為龍又名蛇虺穴

輔龍山 城東北舊馬鞍山宋趙鼎南遷經此稱為松林之輔山故名俗呼挹社嶺

天角潭 州東水深山峻明成化間有龍起此

乳泉 在城東南朝天宮宋蘇軾有賦

相泉 州西宋丞相趙鼎謫儋州過此盛暑渴甚鑿井得泉後知軍方汝運作亭於上曰明秀

滔公井 城西寰宇記云井與淪水通有人以竹置井中於淪水得之俚人呼竹為滔公故名

峻靈山 昌化縣西北本名明山一名神山上有二石形如人帽古傳云有兄弟向海捕魚化為石號兄弟石側有橘柚甘

香云不可携去携去即黑霧暴風駭人池中魚亦然宋蘇軾碑記云五代時有望氣者言山有寶氣番人臚舟其下斲山求之夜半大風浪駕其舟空中碎之石峰之上人皆溺死今碇石猶存元豐五年詔封山神為峻靈王

馬嶺 縣南三峰連聳延亘海濱形如天馬上有石鼓

象石 縣東南石如牛形鷹嘴象鼻擊之有聲如磬

棋子灣 在峻靈山側石如棋子人取之不得選擇取畢視之黑白相均灣上有淡泉自沙中湧出海舟常泊汲之

東山 萬州城東山周六里餘中有石澗兩旁壁立入處僅容一人山門刻珠崖第一仙五字外有盤石周數十丈名補天

石內有大巫峽小巫峽渡仙橋諸勝

彩雲見則州出貴故改今名

金牛嶺 州東北昔傳有金牛夜放光舟人望見之知爲寶氣掘不獲

赤隴山 州東南其土赤色岡隴相連故名

金仙河 在州北河畔有石盆上有馬蹄人跡葫蘆痕相傳交趾道士煉丹於此

有本泉 在城十二里東山石壁元御史邱世傑題曰有本泉

聲山 陵水縣東北寰宇記陵水縣有聲山常有聲如人言

多雲嶺 縣南峻拔巢雲禱雨多應一名靈山

小五指山 縣西脈自五指山至此挺立數峯黎人環居其下下有溫郎嶺脚二峒明嘉靖中征黎常分奇兵出此

龍潭 縣北大河小河之間舊傳有龍起故名

桐棲港 縣西一名鹹水港又名南山港明萬曆十七年海賊

李茂黨掠陵水由此港入兵備孫秉陽破之

鼇山 崖州州西南舊名南山元王士熙常遊此以其枕海更今名上小石邊一穴出泉曰萬仞泉清冷可愛

逸賢洞 州西北宋胡澹菴以其多水竹取竹溪六逸竹林七

賢之義作詩曰溪邊六逸李太白林下七賢山巨源

石盤 去城十三里面平如掌周圍數丈可坐十客林木茂密傍有澗水秋夏不竭清冷甘冽可濯可飲周使君嘗至其處

愛其清絕伐木誅茅結亭石盤之北曰清賞見地輿紀勝

石版山 州東南旁有橫石其平如版宋時知軍事周曠結屋其上

釣臺山 州南山有巨石高二丈餘宋知軍毛奎題小洞天三

字刻石上南有石臨海題曰釣臺又入數步名大洞天題曰
海山奇觀旁有石梯題曰仙梯

玳瑁欄 州東南海邊有巨石數十丈如屋宋陳明甫鑿石爲
欄以養玳瑁

落筆峯 州東石峰獨聳高數十丈中有石洞俗傳有僧於此
坐化又有懸石擊之如磬

迴風嶺 州東北以颶風不過此嶺而名下有溫水池唐李德
裕明張習有詩

鹿迴頭山 州東上有連珠寨宋時臨川土賊陳明甫據此
石龜 州北石如龜長一尋濶二丈有半旱蝗則禱之立應

臨川水 在縣東廢臨川縣以此水名源出黎山分爲兩派前
後夾流後水產石蟹漁人採之初軟出水堅硬如石前水產

海鏡

九龍山 感恩縣西北西枕海濱漢初九龍縣置此
息風山 在城二十五里中有巨穴深百尺許黑暗莫測每颶

風作黎人禱之卽止
黎虞山 縣東黎人常虞獵於此故名見宋祝穆方輿勝覽

感勞山 縣東北下有平坡宋時大兵平黎駐此秋毫無犯士
人感其德而勞之因名

小黎母山 縣東卽莪茶嶺脈自黎母山來危峯聳起崖石崎
嶇羣黎環居其下有巨石刻大元軍馬下營

虞山石鼓 縣東北古鎮州廢城之東河中鼓圓六尺以小石
擊之聲如空甕傍五大石有異人跡及馬蹄痕頂刻大元軍

馬到此

感恩浦 縣東北隋書地理志感恩縣取感恩水為名

溫泉 縣北夏寒冬温有瘋疥瘡氣浴之即愈其東即宋時鎮州地今為黎人雜處旁有石城遺址

佛岡廳

大廟峽 在廳西南吉河口峽中水勢湍激舟過必禱

羊角嶺 廳東南中有尖峯特聳諸峯環抱象如羊角故名

觀音山 廳北周袤百里峯巒叠秀石室虛敞中有天成佛像

南澳廳

雲蓋山 城西南上有雲蓋寺宋時建石上鐫紫花雲蓋四字土人妄傳其中有玉因碎其石

深澳 城北內寬外險一門通舟中容千艘前明寇舟多泊於此嘉靖末有建議填其門者費帑萬金卒無成功後用木石

填塞澳口令民內徙而虛其地未幾倭人用善水者撈取木

石澳口復通

錢澳 在城西隆澳一名錢灣昔時沙中嘗有金銀故名宋張

世傑兵敗於錢灣即此

後澤澳 在城西隆澳明賊首許朝光築寨於此今廢

辭郎洲 在隆澳五嶼之北宋景炎元年帝舟遷於潮州駐蹕

紅螺山明年正月遷於惠州甲子門都統張達率義勇扈從其妻陳璧娘送之至此或作侍郎嶼云陸忠正秀夫調潮時

其子繇好漁獵被逐遂家於此以忠正曾為禮部侍郎故名今按陸於度宗甲戌參議准東制置司事恭帝乙亥為宗正

少卿丙子五月端宗即位直學士院罷居潮州乃直學士院時未聞為禮部侍郎也是其說固未可為據矣

打石坑泉 在深澳水清味甘經月不變居人汲以釀酒
井子澳古井 在隆澳水味甘冽卽井澳宋史建炎十二年丙
申帝至井澳卽此

陽江廳

鳳凰山 廳東北一名北甘山倦游錄云北甘山壁立千仞有
瀑水飛下猿狖不能至鳳凰巢其上彼人呼爲鳳凰山所食
亦虫魚遇大風雨或飄墮其雛小者如鶴而足差短南人截
取其觜謂之鳳凰杯古書謂鳳凰住於丹穴丹穴卽南方也
銀坑山 廳南有十八井相傳宋南恩州知州余久大鼓冶於
此

羅琴山 廳西昔羅含堂携琴游此故名山頂有石如棋盤云
仙人嘗棋於此元琥路珣詩云二尺絲桐月下彈一聲清響

落空山仙翁自笑知音少兩袖天風跨鶴還

馬銜山 廳東北其東南有金花嶺自嶺攀路而上十里至山
頂有巨石如砥可容數十人泉中石罅如馬受勒山因以名
丞相嶺 廳西南相傳宋丞相留正紹興中嘗爲陽江縣尉故
名

北山 城北頂有石如掌名仙人石四旁大石多宋元以來詩
刻明嘉靖間知縣吳煥章刻小蓬萊三大字宋王巨詩有人
問怪泉石嶺外好山川之句

海陵山 廳西南海中舊名羅洲一名羅州又名羅島寰宇記
羅州在海口廻環三百里圖經云海中有魚形如鹿每五月
五日夜悉登岸化爲鹿小於山鹿乃百姓魚鹽之地其中峰
爲草黃山東爲平章山卽張世傑葬處

紫蘿山 廳東南一名瑞靈山又名烟蘿山唐時有紫光燭天
都郡白其事敕置院開山開石龕得經一函題曰大佛名經
有古碑存焉

斜嶺 廳東北蹊徑險惡明正德中御史高紹改營通道避險
就夷人以爲便

平章港 廳西卽世傑覆舟處

風井 廳西北眾山之巔濶丈餘深不測大風則井內先鳴三

日鳴止則風起

連山綏猺廳

天梯山 在城北高險無草木行者難若登天故名

鐘留山 城西北其狀如鐘舊縣治在此

花井 城北百里相傳南宋刺史鄧魯曾所鑿

連州

順山 在城東形如巾幘一名巾山亦名翠巾峰宋張栻明張
暄有詩

北山 城東北怪石周遭其陽有燕臺亭亭之左有振鷺石右
有卧龍石前有天池北去爲天慶觀天澤泉流杯亭流杯池
君子池北山寺六鼇橋寒居洞諸勝

寶華山 在州東南常有雲霞起其上宋向宗道詩云松風山
月送人歸幾處溪聲拂馬蹄殿角參差浦雲影回頭真似武
陵迷

秀巖 州西北平地突兀形如員龜上有懸石如滴翠乳一名
大雲巖宋張栻明張暄有詩

楞伽峽 州南古稱貞女峽或稱貞女山水經注云谿水下流

歷峽南出是峽謂之貞女峽峽西高巖名貞女山山下有石
如人形高七尺狀如女子吉來相傳有數女取螺於此遇風
雨晝晦忽化爲石隋江總有賦宋葉適有鑿楞伽峽記唐韓
愈宋張栻明張暄有詩

圭峰 州西北眾山迴環儼然端立薄暮烟橫蒼翠襲人宋張
栻明張暄有詩

昆湖山 州西一名天際嶺高千丈周百里下有二水夾山而
流春夏暴漲滙聚成湖其間峭壁花岸森然羅列宋陶弼張
栻明張暄有詩

同官峽 州南俗呼爲瞭紗峽轉一曲爲同官口口有洞曰冷
然洞洞中若廣廈數間唐韓愈詩南方二月半春物亦已少
維舟山水間晨坐聽百鳥宿雲尚含姿朝日忽升曉羈旅感

和鳴囚拘念輕矯潺湲淚久迸詰曲思增繞行久且無然蓋
棺事乃了又再游詩今日是何朝天晴物色饒落英千尺墮
遊絲百丈颺泄乳交巖脈懸流揭浪標無心思嶺北猿鳥莫
相撩按昌黎集作同冠峽

靜福山 州東北寰宇記云梁有廖冲者家於此山先天二年
飛昇刺史蔣防仰慕高風刻石爲碑宋張栻明張暄有詩

白鶴山 州西石壁卓立四面如掌相傳有陳真人煉丹於此
後騎鶴上昇故名

牽船嶺 州南上有白石一雙鄉人呼爲雙女神見輿地紀勝
鄧公山 州境昔太守鄧豹葬子於此

師德巖 州北內有石平者如牀垂者如鐘立者如牛羊明嘉
靖間鑿取丹砂遂不如昔

鐘乳穴 在州境及陽山縣境杜佑通典連州有乳穴三十二
陽山有乳穴十九

滙水 州西北一名桂水史記南越尉佗列傳元鼎五年秋衛尉路博德為仗波將軍出桂陽下滙水即此

雙溪水 州西南宋州守王大寶建雙溪閣於其上今廢宋張
棡明張暄有詩

海陽湖 州東唐大厯初道州刺史元結至此修創林洞通小
舟游泛杜抃詩云波心石船並中載白蓮馨見輿地紀勝劉

禹錫游此有海陽十詠曰吏隱亭曰切雲亭曰英雲潭曰元
覽亭曰裴溪曰飛練瀑曰蒙池曰琴絲瀑曰雙溪曰月窟也

龍潭 州西其左右皆石崖宋張棡明張暄有詩
濂泉 州東北順山下宋周敦頤為提刑過此飲之刻濂泉之

源四字於石

潮泉 州南十五里輿地紀勝云泉從山出每二月以後至初
秋則每日丑時水湧至申時止八月以後至初春從申時湧
至丑時止

廟泉 在峽峰絕頂許懋有詩云千丈峽峰石淙錚寒玉鳴見
輿地紀勝

虎跑泉 州境舊經云唐末有僧行圓居此有虎跑地成泉又
廖容詩云仙馭遺踪遠寒泉濺石清舊傳廖真人煉丹無水

虎為跑泉又似指廖真人今附見焉
賢令山 陽山縣城北二里一名牧民山以唐韓愈得名上有
朝陽洞遊息洞又有讀書巖巖邊有并極清冽明鄺志立有

詩

石崖山 縣北有石壁如屏宋紹興初縣令張本中刻聖傳頌於上

陽巖山 縣西輿地紀勝日出先照此山故名

石龍巖 縣南中有兩石龍怪石林立有唐宋詩刻於石

鐘鼓巖 縣西明黃廷才有詩

分水嶺 縣西有唐幕府將軍李玉珪墓明歐陽棣詩山自何

年闢泉從此處流曉風雙鳥出夜月一猿愁

石鐘巖 縣西一名龍巖巖有數層深窅若堂室石乳中懸秉

炬照之光耀人目石如龜蛇相錯有片石下垂扣之作鐘聲

餘為石田丹竈石鼓明吳楚材有記

白石山 在縣西明黎貞有記

芙蓉山 縣北有石室可棲相傳宋顯祐張侯讀書處至今樵

石鐘巖中有讀書聲

明月岡 縣南山有白石圓如白璧月夜有光按輿地紀勝有

月窟廖知彰詩天匠矜功價不貲神機剗石漏春暉即此

三峽 縣東形勢窄狹重重裏束連陽之門戶也舟行最險春

夏水漲舟人待之或經旬不能上下

大鯉峽 縣西一名大鯉峽明林華皖連峽行序云由三峽而

上為大鯉峽峽壁多雲水紋酷似大理石而畫屏天塹矣

龍宮灘 縣西唐韓愈詩浩浩復湯湯灘聲抑更揚奔流疑激

電驚浪似浮霜

三門灘 縣城外東南三石如門雨後湟水建瓴而下瀆浪如

雪明鄭梓有詩

雙女潭 縣南俗傳有二貞女溺此每晴久有雙鯉見則雨

久見則晴上有瀑布

羅定州

石牛山 城南崔巍多石一石狀如牛故名相傳有仙人於山上對奕今棋局隱隱尚存

尖岡 城南有巨石崔巍險固可容數百人居民有警嘗登石避之名曰防虞石

鷺抱石 城東南昔傳有仙人籠鷺求宿娼家有說客善鷄鳴者客聞遽取擔挑鷺去擔折遂坐於石忽不見而鷺亦化爲石今所坐石上足跡宛然

洞清巖 城東岩深十丈相傳昔有岑洞清隱化於此故名

寶峯巖 城南昔曾有石乳滴成布袋和尚像後人置佛像其間爲鄉人禱雨之所

瀧水 城西南石峻陡險故謂之瀧舊瀧水縣以此得名唐宋之問詩有地偏多育蠱風惡如間鯨之句

鷄冠灣 在城西兩峰多鷄冠木水勢滌洞魚多聚此

大紺山 東安縣北世傳昔有神仙煉藥於此樵者深入其中或見池邊茅屋碧桃垂實宛然人居倏忽不知所在

鐵山 縣東北產鐵鑛剖之有竹箭樹葉之形舊常置爐於此九星巖 縣北群峰森列西南一峰有石室高八九丈寬可容數十人一石有竅吹之聲振山谷相傳猺蠻吹以號眾者

浮雲山 縣西南危峰突起峰頂常有白雲相傳陳伯先曾居此上有林泉巖石之勝亦名雲霧山

古蓬山 縣西北一名古蓬洞猺人所居在州界者凡九十四此其一也唐宋之問詩云越嶺千重合蠻溪十里斜竹迷樵

子徑萍匝釣人家林暗交楓葉門香覆橘花誰憐在荒外孤賞足雲霞

書山 縣東鄉人巖穆翹書齋其上子孫皆至仕宦故名

龍巖 縣西北內有清泉水源出粵西萬山中水道蜿蜒至龍喉吐出宋有盤古廟遺跡尚存

大牛石 城西北峭壁如削中有巖竅呼之響答如人應聲

龍頭潭 在大紺山之上懸流如瀑布

錦石山 西甯縣東北上有石柱高插雲表名華表石又名羅

錦石明鄭人達有詩

馬鞍山 縣西勢甚雄峙山頭一尖峰峻削拔天

文昌水 城東一里即古羅水隋置羅陽縣以此名明戈息舟

入羅旁詩瀧江環帶水曲折一舟行鳥道沙沿岸寒山樹繞

城東風楊柳色殘照鷓鴣聲儼有桃源趣蕭蕭野興生

熱水池 城西南松水坪熱如沸鼎人不敢濯

南雄州

楊厯巖 州西北山頂方廣百餘丈前後皆奇峯怪石飛泉瀉

空相傳漢樓船將軍楊僕經此因名明黃佐有詩

青嶂山 在州境翠阜屹立松檜陰翳有神仙隱几一鍋似玉

耆舊傳有石鍋龍王居此歲旱禱雨有應

天峰山 州境山形陡峻高插霄漢山半有洞曰真仙巖唐李

衛公謫處訪至其地優游偃息數月而去蘇文忠公聞名至

止顏其穴曰石髓橫開字跡宛然見宋李儀天峰山記

龜湖山 州東南上有滴水瀦爲小湖舊云有二龜游詠其中

故名

大庾嶺 城北南康記秦始皇畧定揚越謫戍五方南守五嶺

第一塞上嶺即南康大庾嶺李吉甫云漢伐南越有監軍庾

姓城於此地眾軍皆受庾節度故名大庾一名東嶠山水經

注漣水出南康縣涼熱山漣谿山即大庾嶺五嶺之最東故

曰東嶠山嶺上多梅亦曰梅嶺或謂以梅鋪得名唐張九齡奉詔開

鑿至嘉祐中造磚磬砌成路九齡有序並有詩宋之問張說

及宋李昉英陳與文戴復古俱有詩按五嶺謂大庾始安臨賀桂陽揭陽見裴淵廣

記

放鉢石 在大庾嶺雲封寺側相傳六祖得衣鉢南來慧明追

至祖擲衣鉢石上明舉之不動宋章象有詩

二仙壇 在大庾嶺踞山巔輿地紀勝云舊傳劉許二仙烹鍊

於此今有仙茅惟近壇者妙

仙女巖 城東北杉檜森翳泉石潺湲中有二仙像相傳秦時

有二女子於此得道飛仙

姮娥嶂 在大庾嶺之東相傳為葛洪煉丹地

羅漢巖 州東巖洞深廣中有六泉名羅漢井梁天監中有羅

漢瑰像踰旬不見

油山 州東唐開元有僧潤澤以手指書石壁曰油山淨明院

其山不知何年開擴也至今字跡宛然

橫浦水 州境史記南越列傳漢元鼎五年主爵都尉楊僕為

樓船將軍出豫章下橫浦即此一名樓船水又名凌江水輿

地紀勝宋天禧時有凌皓知保昌縣興水利建陂其間農人

感之因號凌江

卓錫泉 在雲封寺東一名霹靂泉相傳六祖過此渴甚以杖

點石遂湧清泉宋張士遜有詩

福民泉 在雲封寺南明宣德七年巡按御史所鑿行旅便之

丹鳳山 始興縣北梁天監中有九鳳飛一鳳翔此因名

機山 縣南一名玲瓏巖石峰平地拔立有石室虛曠葛仙常

煉丹於此盛宏之荊州記云機山東有兩巖相向如鴟尾石

室數十所過皆聞金石絲竹之聲明江樸有記宋蘇軾明王

守仁有記

九鳳山 縣西一名天柱峰梁天監中九鳳翔集峯上傅大士

講經於下

桂山 縣西南陵阜屈曲桂木叢發人多取以為藥

夫靈山 縣境南越志山上有湖冬夏常盈每甲戌日即聞歌

管鼈鼓之聲

朔水 縣東月朔即漲晦即減因名

鳳井泉 縣東梁天監中鳳凰嘗集於此

洗鉢泉 縣東北連石寺舊云梁傅大士濯足洗鉢於此

嘉應州

梅峰 州西明孝子溫禧居其麓遍植梅花因名一名馬蹄峰

東巖 州東宋藍奎讀書巖中洞有水簾又有石鼓擊之有聲

亦名石鼓巖

西巖 州西中有蘭若曰靈境依山為宇景態萬狀宋大慧禪

師居此又其西有羅漢觀音蛇山三巖宋劉安世嘗過此有

題

相公坪 州西北唐丞相張九齡微時曾過憇於此因名

仙花嶂 州境花開如蓬大約丈餘其色白則人安紅則人災

見潛確類書

南田石洞 州西北有奇葩異果人不知名採山者間遇之其
美可茹懷歸則往往路迷有幽人於此仙去郡之名士古姓
者詩云仙客有靈千古在洞門無鑰四時開見輿地紀勝
陰那山 州東南接大浦縣界形如仙掌明王守仁遊此有詩
王壽山 州東北形如殿閣上有仙牛嶺相傳羽客王敬修煉
於此宋蔡蒙吉詩王壽山頭石逕斜不知何處有仙家烟霞
踏徧芒鞋破一路春鳩啼落花

程江 州西輿地紀勝江因程收而名邦人仰程之風故名其
所生之鄉曰義化所住之里曰程源所憇之橋曰程橋於此
江亦云程江

百花洲 州南介兩水之間識云百花洲尾齊州前此地出狀

元見輿地紀勝

蓬萊灘 州境濤浪洶險聲聞數里一名曬甲溪昔韓京帥師
平寇至此舟候中石磴甲盡沉京怒期次日擊石磴甲盡浮
水上故名

曾井 城西一里輿地紀勝云曾姓者所鑿泉甘而冷苦瘡癩
人一飲疾即去一說南漢曾芳令是邑以藥置井中病者飲
之即愈故以名井

六目龜池 城西南宋嘉熙中有龜六目出沒其間故名

羅嶺 興甯縣南羅孟郊家於此

神光山 縣西南邑人羅孟郊讀書山下嘗見異光

和山 縣東北狀若旋螺旁有麻石巖為邑勝境明王天與有
和山麻石巖記

丞相嶺 城西寰宇記云循廣二州分水嶺也唐大曆中宰相常袞除潮州途經此嶺土人因以為名

龍歸洞 縣北昔有龍歸於此下有龍潭歲旱民燒鐵符沈以激之輒得洪水

寶山 縣東北相傳元末陳友定採礦於此旁有黃牛嶺宋李綱徙萬安道常出此有詩云深入尋梅瘴癘鄉是也

大望山 縣東北層巒疊嶂茂林叢棘舊為賊巢明正德間都御史周南破之其山楮一名大帽山

曾子湖 在神光山下羅孟郊於此取魚餉母因名

蚌湖 縣東北中有老蚌大數尺嘗夜吐光互數里
洗硯池 在翰林堂之旁其泉清冷羅孟郊滌硯於此
五華山 長樂縣城西北下有尉佗臺漢高祖遣陸賈封趙佗

為南越王築臺於此名長樂臺久廢

錫坪山 縣西南南近琴口產錫

塔岡 縣南宋時建浮屠於其上故名

魚王石 縣西舊傳四月八日魚聚其下

金魚嶺 縣西霽雨水溢岡阜皆沒獨此嶺形如雙魚鬚鬣騰躍於巨浸中

米潭 縣西南旁多石舊傳石中出米故名

鴉山 平遠縣南明嘉靖末頂山忽作炊爨聲響振林木鴉山忽作鴉聲應之未幾賊亂邑里殘破

梯雲嶺 縣東南兩山夾峙中通徑路雲級峻峭若梯階然

頂山 縣北山多白雲天霽不散產葛土人織以為布

三段嶺 縣東南崇岡巍嶂夾路崎嶇歷涉凡紆迴三折故名

卓筆山 縣東南下有鐵礦又鐵礦山亦產鐵有爐

翀天鳳山 一鎮平縣西南山勢高聳望之如鳳翀天

游曦巖 縣東南上有石鼓石鐘石盂仙人履跡

四姑嶂 縣南以四峰突立得名嶂之麓有石室寬約三丈旁

有石扉里人傳聞有四女往來於是構菴塑像祀之

長潭 縣西北其水四時常綠深不可測上有仙人橋跡

欽州

三山 州南三峰峙立出眾山之表中多孔雀一名孔雀山宋

守陶弼建三山亭其上

釣石 州城外天妃廟前江中宋知州陶弼嘗釣於其上又有

吟石在東門外江中有石窟為弼吟詩處又有醉石在振民

場下江中弼每酌酒於其上

大墓山 州東相傳唐諫議大夫甯悌原墓在此故名

銅魚山 州西北輿地紀勝云相傳山下有巨石陂隄下鑄大

銅魚以為水竇因名一名古竇山

羅浮山 州西北元和志相傳似循州羅浮山因名

分茅嶺 州西南與交阯分界山頂生茅草頭南北異向相傳

漢馬援征交阯立銅柱其下以表漢界唐胡僧詩云一柱高

標險塞垣南蠻不敢犯中原功成自合分茅土何事翻銜意

茲冤一說唐節度使馬總立銅柱在古森峒即此嶺未知孰

是

欽江 城東江中有沙名鴻飛州上有鴻飛亭明林希元有鴻

飛州詩

龍門江 州南交州記云龍門水深百尋大魚登此化成龍不

得過滕腮點額血流此水恒如丹池即欽州龍門江也

五湖 州城外有東湖西湖南湖北湖中湖宋嘉祐八年置見

輿地紀勝宋守陶弼建五湖亭於此

瀑布灣 州西其瀑自石頂飛激下成深灣歲旱鄉人所於灣

傍以石投之兩立至郡人黃仲詩云飛來瀑布破青山遂作

寒流水一灣民庶只疑投石效豈知龍卧在其間見輿地紀

勝

輿地紀勝云此瀑自石頂飛激下成深灣歲旱鄉人所於灣傍以石投之兩立至郡人黃仲詩云飛來瀑布破青山遂作寒流水一灣民庶只疑投石效豈知龍卧在其間見輿地紀勝

輿地紀勝云此瀑自石頂飛激下成深灣歲旱鄉人所於灣傍以石投之兩立至郡人黃仲詩云飛來瀑布破青山遂作寒流水一灣民庶只疑投石效豈知龍卧在其間見輿地紀勝



